

ASO FARAILE, 26 IUNI 2020

Na nofoia e le Fofoga Fetalai le Nofoa i le itula e 9:05 i le taeao.

Tatalo.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofaitulafono.

Malo faafetai le lagimama ma le soifua manuia i le paia o le Palemene faapea foi Ofisa Sili o Pulega o Matagaluega ma Faalapotopotoga a le Malo.

ISI FAASILASILAGA A LE FOFOGA FETALAI

**TEUTEUGA O LE POLOAIGA MO FAALAVELAVE TUTUPU
FAAFUASEI**

FOFOGA FETALAI: Ou te faasilasila atu ua ou taulimaina nei le Teuteuga o le Poloaiga o Faalavelave Tutupu Faafuasei e pei ona faamaonia e Lana Afioga Mamalu O Le Ao o le Malo.

Ou te tapa le Failautusi o le Fono Aoaofaitulafono ina ia tolaulau nei Teuteuga ma faataatia i luga o le Laulau a Fono a le Palemene.

Na tolaulauina e le Failautusi le Teuteuga o le Poloaiga mo Faalavelave Tutupu Faafuasei.

Teuteuga o Poloaiga mo Faalavelave Tutupu Faafuasei:

1. Vaa Fagota ma Vaa Oloa

- I. Le faataga ona taula o vaa fagota i le Uafu i Matautu ia lē silia i le 48 itula mo le la'ueseina o uta i'a, ma toe faatutumu a latou oloa (supplies) ao le'i tuuvaa ese atu ma Samoa;
- II. Le faataga ona taula i le Uafu i Matautu o ni vaa oloa se lua i le taimi e tasi, e fua i luga o ni mafuaaga tatau ma talafeagai ma le gafatia ona faatino vaega moomia mo le saogalemu e le Pulega o Uafu ma Taulaga ma isi itutino o le Malo;

- III. Le faaauau pea ona faatino aiaiga o puipuiga Faasoifua Maloloina i le Uafu, mo le puipuiga o le atunuu mai le faama'i, e galulue faatasi ai le Matagaluega o le Soifua Maloloina, Pulega o Uafu ma Taulaga ma le Matagaluega o Faatoaga ma Faiga Faiva.

2. Taaloga Bingo

- I. Ua tatala taaloga bingo i le Aso Faraile ae tapunia i le 10:00 i le po;
- II. E faatumauiina pea taimi mo taaloga bingo i Aso Toonai e tapunia i le 5:00 i le afiafi.

3. Fehoai i Vaa i le Va o Upolu ma Savaii

- I. Ua tatala feoaiga i Vaa i le va o Upolu ma Savaii, mo i latou e 60 tausaga ma luga atu le matutua;
- II. Faaaoga o Pepa Faamaonia mo penisione a tagata matutua, e feoi fua ai i latou i vaa i le va o Upolu ma Savaii.

E amata faamamaluina nei suiga i le Aso Tofi 25 Iuni 2020 seia toe iai se isi faaaliga.

E faatumauiina pea isi aiaiga o Poloaiiga o Faalavelave Faafuase'i na mua'i tuuina atu.

Sainia i lenei Aso **25** o **Iuni** 2020.

Tuimaleali'ifano Va'aleto'a Sualauvi II)
OLE AO O LE MALO

**TULAFONO TAU FAAOFI O LE FAATATAUINA O TUPE (NU.3)
2019/2020 & TULAFONO TAU FAAOFI O LE FAATATAUINA O
TUPE 2020/2021
– felafolafoaiga i luga o le faitauga faalua**

FOFOGA FETALAI: E tolopo le galuega a le Fono i le aso ananafi o saunoa le Afioga i le Minisita mo Faatoaga ma Faigafaiva.

E ia te au le agaga faaloalo ou te tapa ai lau Afioga e te tulai mai e faaauau lau saunoaga i mea sa laga e sui usufono mamalu.

Tofa Hon LOPAOO NATANIELU MUA (Minisita mo Faatoaga ma Faigafaiva): Lau Afioga i le Fofoga Fetalai, o lea ua ee i le tau le tiuga e pei o le suafa o le tamaloa e i ai lona faleselau. Ua malele foi le manufanua aua o lea ua logoalii logopua le manu sa faafua. Ua afifio mai ma talaaa mai le Maota nei i le soifua laulelei ma le alofa faasoa o le tatou Tapaau i le Lagi.

O le mea lea lau Afioga i le Fofoga Fetalai, e maea le Fono ananafi o i ai foi nai faauilavea a le tele foi o sui usufono o le Maota ae le i lauga ai. Ia, se i vagana ua i ai sau faatagaga ou te tali i ai ona faapea lea ona faia, ae fai mea faalogo atu lava i lau Afioga. Ae o le a faagasolo pea le folasaga mo le Matagaluega o Faatoaga ma Faigafaiva.

O a tatou oloa ave i fafo mai le 2015, o mea tau faatoaga, o le nonu, o i'a, o le koko, suauu, talo, fai Samoa, tipolo, ufi ma ulu. O le 2015 e \$40.4 miliona, 2019 e \$64.5 miliona le aofaiga o tatou fua o faatoaga mo eleele o Samoa sa mafai ona auina atu i atunuu mamao. E lagona ai le agaga faafetai e pei ona faaalua ananafi, ia le sao o le tatou aufaifaatoaga ma le aufaifaiva i le tatou tamaoaiga. E matauina o lo o alualu pea i luga.

Lau Afioga i le Fofoga Fetalai, o nisi sa saunoa i le poloketi lenei e tau o le SAFPROM, ia, sa faaigoaina mai lava i le amataga i le faa-Samoa o le SEFIPOLOMI. O le poloketi lenei e 5 tausaga e amata atu i le tausaga lenei. O tupe o lo o faaagaaga i totonu o le paketi po o totonu o le Tala o le Tupe e pei ona fesiligia ai le Kapeneta e nisi o sui usufono, e fuafua lava i galuega ua uma fuafua e le Matagaluega o Faatoaga ma le Matagaluega o Tupe, o mea e mafai ona faia i le tausaga lenei, tausaga faaletupe o le a amata i le masina fou, e \$11 miliona i le \$12 miliona. O sina faamalamalama puupuu. A o le aofaiga o le poloketi e pei ona taumate mai foi, o le faletupe o le lalolagi IDA grant e \$13.9 miliona, faletupe o le lalolagi regional grant e \$6 miliona tala Amerika, o le IFAD grant e \$3.6 miliona. O le aofaiga atoa e \$23.55 miliona tala Amerika. E pei lava ona faamalamalama atu, e le mafai ona faaoga uma lena tupe i le tausaga e tasi. E 5 tausaga o le faamoemoe o le polokalame, o lo o faapena foi ona galulue Matagaluega e lua i le fuafuaina ma le faasoasoina o seleni, aua le tali atu pe...

Tofa Olo Fiti Afoa Vaai (Salega Sasae): Lau Afioga i le Fofoga Fetalai, o se mea e fia faamalamalama lau Afioga.

FOFOGA FETALAI: Sa taua i lau saunoaga le mea fia faamalamalama.

Tofa Olo Fiti Afoa Vaai: E pei o au tonu lea e agai mai ai le saunoaga, aua sa ou laga tonu lava le mataupu lea. Sa ou laga atu e auala atu i le Minisita o Tupe lau Afioga.

FOFOGA FETALAI: I le Minisita o Tupe?

Tofa Olo Fiti Afoa Vaai: Ia. Sa i ai lava le manatu o le a manino atoatoa...

FOFOGA FETALAI: Ia, faapuupuu mai.

Tofa Olo Fiti Afoa Vaai: Sa i ai lava le manatu o le a manino atoatoa le tulaga e pei ona ou laga ai le mataupu lea. O lalo o le Tala o le Tupe e pei o lau concern lena, o lo o manino mai lava le tupe lea e \$11 miliona na tuuina mai, e pei o le USD\$3.6 million lea sa convert.

FOFOGA FETALAI: Ou te fautu atu...

Tofa Olo Fiti Afoa Vaai: O lo o i lalo lava la o le Tala o le Tupe lau Afioga le tupe lea. O lea ou te malamalama o le process o mea nei o grants e auauai mai. O lea la e auauai mai o lea la ua aumai le tupe lea mai lalo o le IFAD, a o le IDA.

FOFOGA FETALAI: Ou te fautua atu...

Tofa Olo Fiti Afoa Vaai: Ou te le iloa po o fea le mea o auauai i ai, po o fea le mea o ave i ai le tupe lena.

FOFOGA FETALAI: Se i auiliili le Tala o le Tupe ona e tulai mai lea i mea taitasi i le tulaga, o lea e saunoa le Minisita i le aotelega o le tulaga o a tatou fua o faaeleeleaga a le atunuu o lo o auina atu i fafo. Malie le sui usufono a oo atu i mea taitasi ona tulai mai lea.

O le a faaauau le saunoaga a lau Afioga i le Minisita.

Tofa Hon LOPAOO NATANIELU MUA: Faafetai tele i lau Afioga i le Fofoga Fetalai mo le fesoasoani i le faamalamalamaina o lenei mataupu.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, i le ava lava ma le faaaloalo, e tefa le tauala i lau

Afioga ona o le taua tele o lenei mataupu. Ou te tulai ai ma lou agaga faaaloalo.

FOFOGA FETALAI: Malie lau Afioga, se i avatu lava le avanoa i le Afioga i le sui usufono mo Gagaifomauga Nu.3.

Susuga Hon Laauli Polataivao Leuatea: Ou te faatuina atu... Faafetai i lau Afioga. Ou te fia faatuina ai se lafo lau Afioga ina ia manino le mataupu lenei, *Ou te faataatia ai i luma ma tapa le finagalo o le sui usufono ina ia tuu atu i luma o le Afioga i le Minisita o Tupe ma le Taitaifono o Tupe se i sailiili lelei lenei mataupu, e \$20 miliona tala Amerika o lea e fesiligia.*

O le lafo lena lau Afioga ou te tapa ai faamaumauga a le sui usufono pe mafai ona tuuina atu i luma o le Maota.

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai...

Susuga Hon Laauli Polataivao Leuatea: Ina ia manino ma malamalama le folasaga a le Minisita. Ma le agaga faaaloalo, o le lafo lena lau Afioga.

FOFOGA FETALAI: Ia se i onosai mai le sui usufono se i tulai mai le Malo.

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o lea ua uma aumai lau faaiuga, ma o lea e i ai le auiliiliga e aofia ai ma mea na i le taimi tatou te agai i ai. E tatou te auiliiliina le tulaga o tupe faaalu ma tupe maua.

O le mea la lea e tupu i i, ua uma le saunoaga a le Minisita o Tupe, a o lea faatoa mau manatu. E tasi lava le mea lea na ou tulai ai na fesili ai le sui usufono mo Salega Sasae, o le tulaga i le mataupu i le tatou kamupani foi lea o le Vodafone, ma le BlueSky. O lea la na ou faauilavea ai, o lea ou te oo i ai, o le tulaga lena o lea sa fesiligia ai. O le mea lea ou te faanoanoa ai, o le sa saofai i le nofoa ae galo ia te ia mea ia, ua uma le taimi o lea ua oo i le taimi e ta ai. A i ai la ni mea auiliili, o lea e i ai le tai 15 minute e mulimuli mai. Ae se i malamalama lelei le mataupu.

FOFOGA FETALAI: Malo faafetai.

Afioga Faumuina Asi Pauli Wayne Fong (Nuu Tu Taulaga i Sisifo): Lau Afioga i le Fofoga Fetalai...

FOFOGA FETALAI: Malie le sui usufono o... Se i tulai mai le sui usufono mo le Nuu Tu Taulaga i Sisifo...

Afioga Faumuina Asi Pauli Wayne Fong: Ou te fia malamalama foi au i le tulaga i le pepa lea e tau aumai i i. O lea la ou te faaluaina ai le manatu o le sui usufono lea ina ia aumai le pepa lea, e ao lava ona aumai tatou te malamalama ai foi. O lea la e faaluaina ai le manatu lea lau Afioga...

FOFOGA FETALAI: E te fia malamalama i le pepa... Se i onosai mai le sui usufono mo Faleata...

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le Pati lea toa 3, a uma ona sau sese le isi, sau sese le isi, sau sese le isi, a o lea ua uma ona taoto lau faaiuga. Se se i tau ava ia i le Nofoa.

Tofa Olo Fiti Afoa Vaai: Lau Afioga i le Fofoga Fetalai, o le lafo, e tusa ai ma Tulafono Tumau a le Maota, malie lau Afioga, se i talia le lafo, leaga ia manino lelei o tupe a ai tupe ia? O tupe a le atunuu, e le o tuua i lalo o faamaumauga o tupe a le Malo.

FOFOGA FETALAI: O lea ua ou fai atu le faaiuga o le mataupu e fesoasoani atu e faasaoina ai foi le tulaga o le faasologa o le tatou galuega. Ua maea ona saunoa le Minisita o Tupe, ua faapena foi ona faamalamalama e le Palemia le isi vaega i le amataga. A o nisi o outou finagalo e pei ona faaalua, e leai o lea lava e lelei le faasologa o le saunoaga a le Minisita o Faatoaga, ae se i tatou o atu i mea taitasi e auiliili ai le tatou Tala o le Tupe ona faamanino ma tulai mai lea e faamanino le tulaga lena. O le ua ou fai atua le faaiuga, lea e le...

Susuga Hon Laauli Polataivao Leuatea: Lau Afioga, e leai se isi o matou manatu e toe faia. O lea ua e saunoa o le a faia o lea.

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o se mea e fia malamalama atu.

Susuga Hon Laauli Polataivao Leuatea: O le mea lava e fia faasao i le saunoaga a le Palemia, e sese le upu lea o le Pati, leaga o la e faalogologo mai le atunuu. Soia ia e te taitaiseseina le atunuu.

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoui: O le tulaga ua ou toe tulai atu ai...

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Lupesoliai Lolofietele Neioti Aiono Galumalemana Dr. Sailele Malielegaoui: Ona o lea e talanoa mai le auiliiliga o seleni, pei se mea foi lele o i ai se mea o tau nana, a o le faalavelave, tatou te sosolo lava i luga o tatou Tulafono Tumau. Ua uma ona le taimi... o le taimi tonu lava lea o le Minisita o Tupe. O lona uiga a fai nei le mea lea, ia o le tu atu lava o lea tulai mai se i faamatala atu, ae ua ova ma le 3 vaiaso o i ina le Tala o le Tupe tou te faitau ai ma saga faitau ai ma saga malamalama ai.

Lau Afioga i le Fofoga Fetalai, o le ala lea, o lea e faamatalatala atu mataupu ae... le Pati lea toa 3, ua fai ma faalavelave, e fiu lava e nana i lalo le mea o le tamaimoa ae ioio ae lava. Malie ia le tou Pati na o le 3, e le aloaia Pati na o le toa 3, seiloga e toa 8.

Lau Afioga i le Fofoga Fetalai, ia o le tulaga lena, ae afai tou te mananao loa e faatu aloaia, fai le mea amiotonu, faamavae mai i le Maota ae toe o e toe fai tou faiga palota.

Susuga Hon Laauli Polataivao Leuatea: Lau Afioga i le Fofoga Fetalai, e tumu i le ava atu lau Afioga.

Afioga Faumuina Asi Pauli Wayne Fong: Lau Afioga i le Fofoga Fetalai, o le mea fia faamalamalama lau Afioga.

FOFOGA FETALAI: E faapea la... Malie le sui usufono... Se i alaala mai lava i lalo le sui usufono mo Faleata ma le sui usufono mo Gagaifomauga Nu.3. O lea ou te taumafai e tatau i le moa o le ala ina ia lelei ona faagasolo taualumaga o le tatou galuega. O tatou foi e galulue e limataitaiina i a tatou Tulafono Tumau. O lea ua tuuina mai ia te au faamaumauga o le tatou galuega, o saunoaga i totonu o le Maota lenei, o lea sa talifuaiteu le Minisita o Tupe e faamalamalama le vaiiliu lea sa fesiligia e le sui usufono mo Salega, o lea ua toe lagolago mai i ai le sui usufono mo Gagaifomauga Nu.3, o lea ua tulai mai le sui usufono mo Faleata e faaluaina e lagolago i le lafo e pei ona faatu mai, a ua uma ona faamalamalama. E leai ni mea faapena e tutupu i totonu o le Palemene, ma o lea ou te faapea atu, malilie sui usufono onosai mai seia tatou oo atu i le auiliiliga o le tatou Tala o le Tupe ona maua lea o avanoa e lua tai 15 i le Minisita e tasi.

Tulai mai lau Afioga i le Minisita mo Faatoaga ma Faigafaiva.

Afioga Faumuina Asi Pauli Wayne Fong: Lau Afioga i le Fofoga Fetalai...

FOFOGA FETALAI: Ua ou faia le faaiuga. O le tulai mai o le sui usufono e faatauanau se manatu o le Fofoga Fetalai a ua maea ona fai le faaiuga, o le soli Fono.

Afioga Faumuina Asi Pauli Wayne Fong: Ia faafetai. Na pau lava le mea e leai se Pati o ou i ai lau Afioga, o lea foi e fia maua le pepa lea pe moni pe leai. E lelei lava le tatou autilotilo i ai aua e le iloa po o se pepa sese a o lea o le a taitaiseseina ai tatou i lenei taeao.

FOFOGA FETALAI: O lea ua ou fai atu. Ua ou fai atu... Se e tuu tuu mai na pepa fai atu e aumai faamaoniga ae le mafai ona aumai faamaoniga. Taoto ia faapena se i tulai mai le...

Susuga Hon Laauli Polataivao Leuatea: Ioe lau Afioga, se o le ala lena o le tulai atu o lea e i ai faamaoniga. Pe ta le tauala i lau Afioga pe talia le lafo pe leai. Na pau lena o le mea na tatalo atu ai ma le agaga faaaloalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o le mea e fia faasao.

FOFOGA FETALAI: Malie la se i oo atu i mea taitasi i le auiliiliga o le tatou Tala o le Tupe. Saunoa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O au sa ou faapea e le tu tu mai sui usufono ia ma aumai latou pepa faamaonia. Pepa faamaonia a o lea e matua le faamaonia isi pepa ia na aumai muamua? O lea foi e aafia uma ai lava ma le alii le la e tu tu mai o, lea faatoa uma atu nei lana saunoaga. Faamolemole, taofi ai tou pepa faamaonia, o lea foi e faulai isi pepa faamaonia lea na maua atu nei e pepelo uma lava?

Lau Afioga i le Fofoga Fetalai, o le fesoasoani atu lena.

Susuga Hon Laauli Polataivao Leuatea: E tuga le tuuaiga lea lau Afioga i le Fofoga Fetalai.

FOFOGA FETALAI: Malie ia.

Susuga Hon Laauli Polataivao Leuatea: O la e silasila le atunuu. Ia e faapefea ona e saunoa e le i aumaia le Lipoti a le Komiti? Se paga lou tautaaaleaga lau Afioga i le Palemia.

FOFOGA FETALAI: Malie ia le sui usufono o lea ua ou...

Susuga Hon Laauli Polataivao Leuatea: Se paga lea, e le i aumaia le Lipoti a le Komiti a o lea ua e tolaulau e le faamaonia?

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, masalo ua galo i le sui usufono o lea ua uma mai le isi Lipoti lena e aumai ai le anoano, lea e tau manino mai ai, o lana afi lea na aumai, e le o se afi, o le mea o le pusaaisa lea na faatumu ai pepa. Ae a na le oo atu i o i le Komiti o Tupe e le iloa ai e le o se pusaaisa o le afi. Ae na aumai e le sui usufono le la e tuu mai o i le Itu le la.

Susuga Hon Laauli Polataivao Leuatea: Lau Afioga i le Fofoga Fetalai, i le agaga ma le faaaloalo, ia se i silasila la i le faaoloataua lea ua fai nei?

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea la ua ou toe avea ai i o i le Komiti...

Susuga Hon Laauli Polataivao Leuatea: Ia silasila la i lau saunoaga? Silasila i lau faaoloataua e sese au saunoaga, leaga o lea e le i aumaia le Lipoti a le Komiti.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le Komiti lea na aumai muamua lea na tau mai ai mea ia.

Susuga Hon Laauli Polataivao Leuatea: O le Komiti na e tofia. E le o se mea amiotonu le toe filifili e le Komiti o Tupe lau Lipoti.

FOFOGA FETALAI: Malie le sui usufono... Lau Afioga i le sui usufono mamalu, lau Afioga i le sui usufono mamalu, malie...

Susuga Hon Laauli Polataivao Leuatea: Se e ava atu lau Afioga i le Fofoga Fetalai... Don't abuse your power.

FOFOGA FETALAI: E ala ona lagalaga le Palemene, ona o lo outou tulai mai. E le mafai foi ona tuuaunoaina e le Malo le tulai atu e talifuitau i

mea sa outou laga. O le mea la lea, malie o lea ua ou tuu atu le avanoa i le taimi e laga mai ai le mataupu lea tou te fia fesiligia. E ui lava ina ua maea ona tali faafia i ai le Minisita o Tupe, e faapena foi le Taitai o le Malo. E faamalulu atu ai i o outou finagalo, e faapea lava uiga o le soifuaga lea tatou te i ai, ae ia outou silafia, e le faigofie le taumafai o le Malo e faamalamalama mataupu tou te lagaina mai i totonu o le tatou Fono. Ae le faapea o le a ave ifo lou finagalo faapea e fai ai le finagalo o le Malo. O lou finagalo e pei ona faaalua, o lou lava lea finagalo, o lou lava lea manatu, ae ese ai le faamalamalama a le Malo, o le faamalamalama lena e manino ai auofala, ma, that's final. Ma o le faamalamalama lena e muliai i ai faamalamalama o mataupu e laga i totonu o le Palemene.

O le mea lea, ou te faamalulu atu...

Afioga Faumuina Asi Pauli Wayne Fong: Lau Afioga i le Fofoga Fetalai, leaga o lea ua taua mai le sui usufono lenei i le tulaga lea i mea o faamomoli na aumai.

FOFOGA FETALAI: Se malie ia le sui usufono. Ia, a foi o le mea lena e fai mai ai le upu a le isi toaina, "E lavea lava a le moa o le taafale fua." Ioe.

Afioga Faumuina Asi Pauli Wayne Fong: Ia, o lau moa e le taafale lau Afioga, o lea lava e taa iinei i le Palemene. O lea sa fia tali atu i le toaina, ae le afaina, ma e le o se moa foi o le toa lau Afioga.

FOFOGA FETALAI: Se malie ia le sui usufono. Ou te faamalulu atu ma ou faamolemole atu... E leai, e faapena, e lavea lava o le faimisa ese fua. Ia, tulai maia e faaauau le saunoaga i lau Afioga.

Tofa Hon LOPAOO NATANIELU MUA: Faafetai lava i lau Afioga i le Fofoga Fetalai. Ona o poloketi o faiga faavae ia e mulimuli ai le Matagaluga o Faatoaga o lea o le a tolaulau atu aua e aoga, o la e faafofoga mai le tatou atunuu. Ia ae ou te manatua lava le tala a le isi papalagi foi lele, "those who live in glass houses don't throw stones." Ia o le mea lena e ala ai ona tauai atu o le tou tauai mai. O le manatu ea o outou o le a tauai mai ae matou nofonofo?

Lau Afioga i le Fofoga Fetalai, tasi lena galuga o poloketi o lea ua agai i ai le...

Tofa Olo Fiti Afoa Vaai: Lau Afioga i le Fofoga Fetalai, ana tali sao ma aua le fefe e tali le fesili, ona leai lava lea o se mea e vevesi ai. Leaga o lea e fefe e tali po o le a le faaogaina o le \$50 miliona lea. O le mea lena o lea e tupu ai le vevesi.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faasao. O ituaiga uiga lava ia o le sui usufono lea e le mafaufau. O lea e faulai mea ia i i o lea e faasolosolo atu, ae leai ni mea o nanaina. O le faalavelave, o le umi o le taimi na avatu ai mataupu, ae pauu taitasi mai a tou mataupu, le tou toatolu lea. Ae malie ia, o le Lipoti lea sa ou taua, ou te le i agai atu i le Lipoti lea e le i aumaia a le Komiti lea o Tulaga Taualoa. Na ala foi ona toe ave le Lipoti lea na aumai muamua a le Komiti o Tupe, o lau talosaga mai sa tatau ona ave i o, ia lea lava ua faatino lou finagalo. Lea la e faatali. A o le Lipoti muamua a le Komiti o Tupe, lea na aumai i i ma tatou faitau uma ai, e i ai la upu ia na ou talanoa atu ai. E le o se taufaaleaga la le mea lene lau Afioga i le Fofoga Fetalai o lea e talanoa i Lipoti ua uma ona aumai i totonu o le Palemene.

Susuga Hon Laauli Polataivao Leuatea: Malie lau Afioga i le Fofoga Fetalai, paga lava lea, e nofo lava ma le faanoanoa, e nofo lava ma le mafatia tele.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O lea la ua toe tuu atu i le Komiti lene e toe tilotilo i ai e tusa ma lana talosaga ae meamanu o le mataupu ua leva ona uma.

Lau Afioga i le Fofoga Fetalai, o lou toe tulai atu lea.

FOFOGA FETALAI: Malo faafetai. Ia ua ou manatu...

Susuga Hon Laauli Polataivao Leuatea: Ia malie lau Afioga i le Fofoga Fetalai, paga lava lea, e nofo lava ma le faanoanoa, nofo lava ma le mafatia tele. Lau Afioga, se malie lava Toleafoa, leaga o la e faafogafoga le atunuu, ua taupepeloina ma tauagavaaina ma upu ia na fai nei i le taeao, ae le i taunuu mai le Lipoti mulimuli. O le Lipoti a le Komiti o Tupe, e alu pito tasi e leai sota leo, ona aumai lea ou te le amiotonu, lea na ou tatalo ai. E le i taunuu mai la le Lipoti a le Komiti, o mea uma na e faufaua. O mea na e manao e fafau ia ou lavea ai.

FOFOGA FETALAI: Ia, e faapea... Malie Gagaifomauga Nu.3 se i...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faasao. O lea e taoto Lipoti ia na aumai muamua lea e faavae ai lau tautalaga, ioe. A o mea uma lava ia na e alu ai i luga o le TV, o oe lea e usu, o oe lea e usu. O le a le uiga o ia mea? O lea e te amatamea, a o au lea ou te tali atu i au mea. Ae afai la e faaaliali atu pepa ia o le

faamaoniga ae e nofo foi ma fai mai, ua sese le Palemia o le a molia i luga o le Contempt of Court. O le a le Contempt of Court? O oe lena e te Contempt of Court.

Lau Afioga i le Fofoga Fetalai, ua faauma, ua ou faamagalo i ai i le sui usufono. Ou te faamagalo atu ia te oe.

FOFOGA FETALAI: Ia, ua maea le mataupu.

Susuga Hon Laauli Polataivao Leuatea: Ia, e faamasino le atunuu, e faamasino le atunuu, e faamasino le atunuu, o oe na e usu. Ua e lau uma i luga mea la e faatali le iuga o le faamasinoga. E lau nei, o le aso e lau ai le mea lea e te faaleaga ai au, o le aso, o le aso lenei.

FOFOGA FETALAI: Malie le sui usufono, o lea ou te fesoasoani atu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, se i ou tulai atu lava i le mea lea faamolemole. Se i ou tulai atu lava i le mea lea. O lea ua toe sau le faasalalauga a le tatou Loia Sili, o lena e faasao mai e latou mea sese ia e tautala soo i ai le sui usufono lea. O la e faaoga le latou malosi, e leai lava se isi e aiaina le latou faaiuga fai mo le molia o se isi. Na o le pau lava le mea, e oo mai loa i le tulaga lena, na o le pau lava le mea e faalogo i ai, o le faamasinoga, a o lea e fealuai ma tau, o au lea e uunaia faamasinoga ia. O le mea lea lau Afioga i le sui usufono, malie ia Tupua, e tatau foi ona e faalogo ia Fatialofa ma Auelua e polapui ia te oe, e tausivaatele ia te oe o oe o le matai Lepa.

Susuga Hon Laauli Polataivao Leuatea: E leai sau tausiga o fai ia Tupua ma le Puletiua. O lea e te soli lo tatou va.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le ala lena o lea ou te tulai atu ai, ua tele lou faaletonu.

Susuga Hon Laauli Polataivao Leuatea: O fea lau tausiga? Fea lau tausiga? lea e te faaleaga e te taumafai e fasioti au.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O lea ou te taumafai ia e amiotonu. O lea foi ou te taumafai atu e faasaosao au mea ia e fai. E faamasino le atunuu. Sopo tuaoi.

Susuga Hon Laauli Polataivao Leuatea: O lea foi ou te taumafai e faasaosao au mea ia e fai. E faamasino le atunuu. Fea lau tausiga? Sopo tuaoi.

FOFOGA FETALAI: Ia, malie le sui usufono. E faapea... O le tatou saofaiga i le Fono a le Palemene, e moni e tumuai tutusa, o le faipule lava o le faipule, ae ave le faaaloalo i le tatau ai le faaaloalo. O ai? Tatou te ave le faaaloalo i le Taitai o le Malo, ioe, o le Taitai foi lea o le Maota. E faapena. O le a sota tiga a o le a foi se mataupu ua faapena ona aafia ai ma faamanuaina ai le finagalo o lea sui usufono ma lea sui usufono, e maua lava le tulaga o le faaaloalo. E faapena. Na avea i tatou ma sui usufono na filifilia mai le atunuu tatou te omai iinei e faavae i luga o le tu ma le aganuu. O le a le tu ma le aganuu? O le faaaloalo, o le faaaloalo. Ioe. O le mea la lea, se ou te faamalulu atu i sui usufono mamalu, e fai ava foi ma fai fuafua, afai foi ua tetele atu lea itu, ia onosai, tatou maua le agaga foi lea o le fefaamagaloi.

E faamalulu atu i le sui usufono mo Gagaifomauga Nu.3...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai ua sao lau tuleiga, ma o lea la ua ou te toe tulai atu ai, le sui usufono mo Gagaifomauga Nu.3, ia ua ou faamalulu atu, o lea foi ua ou faamagaloa oe faamagaloa uma ma le sui usufono mo Salega, ma le sui usufono le la, o lea ua ou faamagaloa atu ia te outou. Ae tatou alo i se taeao fou.

FOFOGA FETALAI: Malo.

Susuga Hon Laauli Polataivao Leuatea: O sau upu ua laavale lau Afioga i le Fofoga Fetalai, e asuasua atu vaimalu i puega. Lau Afioga i le Palemia, e silafia e le Atua lou fatu mo oe, e silafia e le Atua. Ae paga lea, ua ta va i vanu talu mea nei. Faatoese i le Atua, ua uma ona ou faamagaloa oe, ae faatoese i le Atua. O sau upu i le Palemene o Samoa, ou te faamalulu atu ma ou faatoese atu. Le faafofogaaga a le atunuu, ia malu ave i fale i outou finagalo, faafoi mai se upu a Laauli i lenei taeao.

FOFOGA FETALAI: Malo faafetai. O i tonu lava e taunuu ai le upu lea, e fetaa lava tama a o le uso, leaga o oulua uma o Lepa. Ioe. O le mea la lea o lea ou te taumafai atu ai, ioe. E faapena. Ae le tau fautuaina e le matapia le manaia, ae suiula lava aua lo tatou Palemene. O le mea la lea, tatou ave ia pisa mo nuu le aina, ae tatou alo i le tatou galuega. Ioe.

Ou te tapa lau Afioga i le Minisita mo Faatoaga, alo maia e faaauau lau saunoaga.

Tofa Hon LOPAOO NATANIELU MUA: Faafetai tele i lau Afioga i le Fofoga Fetalai. O le faaauauina o le faamatalaga, o le isi galuega po o le isi polokalame o lo o faatino, o lea la ua uma foi ona saina e amata i se taimi o le tausaga nei i le faaiuga o le SCATAP o le tatou galuega lea o le polokalame lea faa-faigapaaga ma le Malo o Saina, e 3 tausaga e \$5 miliona, ae tele lava i le vaega o fualaau faisua. O lea foi ua uma ona tilotilo ma silasila foi i le polokalame na amata mai i le tausaga ua mavae o le phase 4, a o le phase 5 lea, pei e faapito le polokalame lea i le tatou fualaau faisua. Ma ua i ai foi le tele o taunuuga lelei o lenei galuega, ua tatou molimauina foi i le tatou South Pacific Games lea na tea atu nei, e laiti lava nai mea na oka mai fafo, a o le tele o le tatou fualaau faisua na maua lava i totonu, o le tasi lena pine faamau o le lelei ma le alualu i luma o le tatou polokalame lea.

O le Polokalame foi lenei, o lea ua maua tatou meaai a moa, tulou. E gaosi mai lava i mea e mafai na fai i totonu o le tatou atunuu. E pau na o le mea na faaopopo i ai i totonu o le galuega lea, o masini e gaosia ai meaai a moa, a o lona tau e 50% e taugofie ai na i lo le tau lea e faatau ai le meaai i le taimi nei. A faapea e faagasolo foi galuega, le galulue faatasi o saienitisi ma le Malo o Saina, faapea foi le tatou Matagaluega o Faatoaga, e le iloa pe oo atu i ai ua tele se faamama avega, ma tau le alu ai foi ni seleni i le tau okaina mai o ni meaai faapena mai fafo. O lo o i ai foi le Farmer plus, o le poloketi lenei, e i ai feutagaiga na fai e le tatou Ofisa o le Va-i-fafo, Niu Sila ma Ausetalia. O lo o faagaoioi pea ma faaauau pea....

FOFOGA FETALAI: Se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: Ou te manatu e le tatau ona laaloa le Maota lenei i le taua o le atinae lea ua faafogafoga i ai, ou te faafetai i le Minisita. Ou te faafetai foi i le aufaigaluega aemaise le Malo agalelei o Saina. O lea e maua mai ai le fesoasoani lea, o tagata nei o lo o lava lo latou tomiai. E le mafai, le mafai, le mafai ona agai i luma le atunuu lenei i le tulaga o le atinae o lafu moa ma le atinae mo fuamoa, aemaise foi o le lagolago atu i isi atinae o meaituaolo ma manupapalagi. Pe a le fofoina le mataupu lea ua leva tele. Sa matau sa fai le tatou factory e gaosi ai meaai a manu. O le a le mea na oo i ai? E le i tau lau o le faamoemoe, ma o le tulaga moni lena lau Afioga i le Fofoga Fetalai, lea na faatagitoia ai atinae nei. Mo le agai atu i le lumanai, e matua manaomia ia latou nei e faia lafu manu nei, lafu moa ma fuamoa. O lea ou te iloa e toa 2 alii faipisinisi lea e i ai le vaai mamao mo le atinaeina o moa faapea foi ma fuamoa. Ma e ono tele foi ni atinae o lafu manu o meaituaolo, e fesoasoani foi i manupapalagi pe a taunuu le faamoemoe lenei, e atiae lava i Samoa meaai a manu. Ae ia atoatoa i ai ia mea uma ia e manaomia mo le tupu taolaola o atinae nei. E oti uma

lava le tele o tatou taumafaiga i lafu manu, pe a leai le atinae lea, o le matua tele, ma o le fatu atoa lea. Lau Afioga i le Fofoga Fetalai, o le successful po o le tulaga o le taunuu manuia, o mea nei o le faalagolago o le atunuu lenei i fuamoa ma moa. Pe a faatino le atinae lenei, ma fai mai lava i totonu o mea o lo o maua i totonu o le tatou atunuu ia meaai ia. O lea ua faafogafoga, o lo o ua tele le i'a lea ua aumai, e tasi lena vaega e mafai ona faaaoga ia mea lafoai mai i'a, mai le tele o vaa ia ua o mai. E maua mai ai le fish-meal, e atili oa ai le tapenaina o meaai nei mo tatou lafumanu.

Lau Afioga i le Fofoga Fetalai, ua ou manatu e fai sau upu faapitoa, ona o le ki atoa lea o tatou atinae moa ma atinae fuamoa. Ou te faafetaia i laua ia, kamupani ia e lua tetele, lea ua agai i le mea lea, ma o le mafuaaga foi lena o lea e faafaigofie ai ona to i ai matupalapala ma ave i ai fesoasoani, ina ia atili tupu ai a latou atinae nei, ma le toe faamoemoe ai lo tatou atunuu i fafo, i taumafa nei. E le gata i lea a o le maua pea o galuega mo tatou tagata e fesoasoani atili ai i nei foi ituaiga atinae. Ou te manatu o le mea tele lea ua maua e tatou mai fesoasoani mai Saina i latou experts, po o tagata e popoto faapitoa, lea ua aoaoina tatou. O ia foi atinae, ae le gata i lena o le atinae lea o vegetables, o laau aina. E tosina i ai agaga o tatou aufaifaatoaga, na tatou ola mai lava, o le talo lava, niu, koko, a o lea la ua faaopoopo atu ma le taleni lea o le aufaifaatoaga mo fualaau aina, ua agai i ai le toatele o le tatou atunuu, e sui sui tauau, i mea sa o tatou masani ai, aemaise o le puupuu o le taimi e mafai ona selesele mai i le 2 i le 3 masina. O lona uiga o meaai foi ia e matua manaomia e i latou e asiasi maimoa mai i Samoa, aemaise o vaa ia e o mai e manao e supply atu latou i Samoa nei, i meaai tonu lava ia e manaomia e i latou, ma o le mafuaaga foi lena, o lea e augofie ai foi le Matagaluega o Faigafaiva ma Faatoaga e galulue faatasi ma le vaega lea e lau maia suauu i totonu ina ia lava ma totoe ia tatou storage. O a tatou tane teu suauu, ona ua matua tele vave tele le afe mai o vaa, e utu atu i inei, mo le mafuaaga e tasi. O le mafuaaga e tasi, o tatou lea e i le ogtotonu o ogasami tetele e liolio ai Samoa, e faigofie ona afe mai, ona o le laititi o si o tatou ogasami, ae tele ogasami ia e siomia ai tatou, na ona alu atu lava fagota, afe mai i Samoa utu, ma atili tatala ai lena maketi fou mo atou aufaifaatoaga, lafumoia ma atinae eseese, o mea ua sili atu na i lo le tatou meaai manaomia mo nai o tatou tagata. Lau Afioga i le Fofoga Fetalai, o le mafuaaga lena ua ou toe tulai atu ai, leaga e taua tele le poloketi lenei, po o le atinae lenei mo le tatou atunuu atoa.

FOFOGA FETALAI: Malo faafetai, ua matua sao lelei le saunoaga a le Palemia, sao lelei. Maua meaai a moa, o le a atinae moa uma aiga, e le toe oge i lena mea. Malo taumafai i lau Afioga. Tulai mai lau Afioga... Faafetai, malo taumafai i atinae o le atunuu.

Tofa Hon LOPAOO NATANIELU MUA: Faafetai lau Afioga i le Fofoga Fetalai, faapea foi i lau Afioga i le Palemia, mo le lagolagosua i le folasaga a le matou Matagaluega. Ona o lea ua tatou talanoa i moa, ae o le fuamoa, o le manaia ia o le mea sa i ai ia Mati ma Aperila. Na logo mai au ua pau i lalo le tau o le fuamoa i le taseni mai le \$7+ i le \$4. O se tasi lena vaega faafiafia loto. Ona ua mafai ona o lea e fai i totonu o le tatou atunuu ia fuamoa. O le auala lena e iloa ai, o lea e i ai toe tele ia o le aoga i lo tatou atunuu, e le gata i le faasaoina o tupe i fafo, import substitution, a o le mafai e le tatou atunuu ona tausasami i mea e fresh. Alu ese mai lava i le tino o le moa talaatu ananafi, ae oo mai i luga o le laulau tausami nei i le taeao. Ua le pei o le mea sa i ai, oka mamao mai Amerika le tatou fuamoa, a o lea ua tatou tausami i nisi o meaai ia. E pei o le tulaga lena e momoli ai foi le agaga faafetai i le Tanumapua Farms ma le Sunshine Farms, mo le latou sao, i lea vaega o le tatou atinae. Sa ou talanoaina ma taua ia Farmer Plus, o feutagaiga e faia i luga o le Matagaluega o le Va-i-fafo ma Niu Sila ma Ausetalia, lea e i ai le polokalame lea. E 6 atunuu o le pasefika u faamanuiaina ai, AU\$46 miliona. O lo o mafai ona fai sao atu lava i le Komiti, ia talosaga i le fesoasoai i le taumafaia ia faaleleia le auina atu o tatou oloa i fafo. E i ai le Komiti lena na tofia e le Kapeneta e tau o le MORC Committe, o lo o i ai le Matagaluega o Faatoaga, Matagaluega o Tupe, Matagaluega o Pisinisi faapea foi ma le tatou Private Sector, o le Chamber of Commerce o lo o i ai o latou sui i totonu o le Komiti, latou te iloiloaina talosaga, e faatulai atu i le tatou pololamae lea.

Faasolo pea le Folasaga, o le talo e pei ona fesiligia e nisi o sui usufono. O le taimi lena i le tau o le talo lea e alu nei i Niu Sila ma soo se mea, e i le va o le \$60 i le \$70. Ua logo mai matou e le Farmer Joe, Agro-Farms, faapea foi ia Sua Tanielu ma nisi o i latou o lo o avea le tatou talo i fafo. O le tau lena o lo o aveina ai le talo, e 22 kilo i le taimi nei, o le va o le \$60 i le \$70, e faapena foi nai vaega o lo o avea le tatou talo i Tutuila, o le tau lena. E i ai taimi e pau ai i lalo le tatou tau e pei ona faamatala atu i se taimi ua tuanai, ona o le fuafuaga lava lea i le tau o maketi. A latiti foi le manaomia ona o faafitauli, e po o ua tele foi nisi talo a nisi atunuu, e faapena lava ona pau i lalo le tau o le talo. Ae mo le taimi nei, o lo o manaia ma maualuga le tau o lo o faatauina atu ai i tatou aufaifaatoaga, ia le talo mo maketi i fafo. Ua uma ona talanoa atu i fuamoa, o lo o i ai le fuafuaga nei ma i latou o lo o atinaeina le moa. O le a faia se Polokalame e aumai e latou le moa ona tufa atu lea. O le Product Chicken Development Project, e ave lea i faifaatoaga, latou te fafagaina ona toe faatau mai lea ia latou. O lena Polokalame ua uma foi ona fesoasoani i ai lo tatou Malo, e ala i le Incentive Board, ina i mafai ona faatinoina. E i ai le fuafuaga i se taimi o le tausaga fou ua amata ona galue, o lea ua taunuu mai mea e amata ai lea faamoemoe. Ua silafia foi e le tatou atunuu ma le tatou Maota nei, i le tele o fesoasoani ua aumai e le tatou Malo e faamalosi ai galuega o lo o faatino e tatou aufaifaatoaga. E pei ona fai atu se faamatalaga, o lea lava sa galulue o tatou tagata. O le pine faamau, ua oo

i le taimi ua faaletonu foi le aumaia i totonu o meataumafa mai fafo. Ae sa le mafai lava ona i ai se tagata Samoa na fia ai, o le agaga faafetai lena, sa faaoo atu ananafi mo le aufaifaatoaga. Ae na i ai tatou tiapula na faafesoasoani atu, o tatou lafumanu, manupapalagi o mamoe, sa avatu ia i latou ua atoa le tai 2 tausaga o i luga o le lisi faatalitali, o lea sa faapea ona ave i ai le faasoaa le Matagaluega e tauala i le tatou Polokalame o le Stimulus, lea na tuu mai e le Afioga i le Minisita o Tupe ma lana Matagaluega. E i ai nisi o fuafuaga na tuuina mai mo le aufaifaiva, o lea ua faailoa atu e le tatou Matagaluega o Faigafaiva.

Afioga Afoa Amituanai Faleulu Maui (Palauli Sisifo): Malie lava lau Afioga i le Fofoga Fetalai. Ia ou te fia faafetai atu i le Minisita se meamanu lea ua oo i le tulaga o le stimulus package. Faamolemole lau Afioga i le Fofoga Fetalai...

FOFOGA FETALAI: Sa taua i lau saunoaga mea tau faatoaga.

Afioga Afoa Amituanai Faleulu Maui: E toeitiiti lava oo i ai lau faamatalaga ae taofi loa. Ae tuu mai le avanoa sou faafetai i le Ofisa o Faatoaga.

FOFOGA FETALAI: Afai o tusi i le pepa ae le o faaleoa, o lena lava e lavea i le leai.

Afioga Afoa Amituanai Faleulu Maui: Ae lavea i le Tala o le tupe lea e taua nei, lau Afioga.

FOFOGA FETALAI: Se i faapuupuu mai lava.

Afioga Afoa Amituanai Faleulu Maui: Faafetai i lau Afioga. E momoli lau faafetai i le Minisita, ona o le program lea o le stimulus, lea e i ai le \$2 miliona lea e avatu ai tiapula ma mea faapena i le tatou atunuu. O se Polokalame pito sili ona manaia lea, e pau lava si ona lave e le o lava le \$2 miliona lena e avatu e le Minisita o Tupe, e fai ai le tulaga lea. Na ou alu atu e aumai ni au tiapula i gauta i Nuu, ae fai mai nai tama, o la e taumafai ona aumai, o la e faatali se isi tupe ona ua uma le isi tupe lea na avatu. O lea mea lea e fautua atu ai i lau Afioga, toe avatu se isi \$2 miliona e faaopoopo i le stimulus package i mea tau faatoaga ia.

FOFOGA FETALAI: E le talia se mataupu pe a ave faa-faatonuga, ae ave o le fautuaga.

Afioga Afoa Amituanai Faleulu Maui: O le fautuaga lena faamolemole. O le Polokalame lea i koko ma niu, o le matua manaia lava, matau o le koko, pe 4 tausaga 5 tausaga. A o le niu e 5 tausaga faatoa e vaai i fua, o le mea la ou te fai atu ai, faamolemole, fai ni incentive foi ia e pay ai i tagata na e faia mea na. Ae manaia le Polokalame, faafetai i le Malo i le faia o tupe ia mo mea ia.

Tofa Aumua Isaia Lameko (Falealili Sisifo): Lau Afioga i le Fofoga Fetalai pe maua sina avanoa.

FOFOGA FETALAI: Sa...

Tofa Aumua Isaia Lameko: Ia sa lavea i lau lauga le mataupu lea e faatatau i le Faigafaiva. Faafetai i lau Afioga i le Minisita, o lea ua maua mai tala talatu ananafi mai tua i Poutasi, faafetai mo le pole fagota. E momoli foi lau faafetai i le tamalii ia Luafutu Faamoana, aua le fesoasoani i le faatuina o le pole fagota lea i gatai o Poutasi. Ia Falealili, o lea ua i ai le tatou pole fagota o lea ua maea ona faatinoina.

I le tulaga i tiapula, o lau tuualalo i lau Afioga i le Minisita, o le lipoti lea faale-tausaga 2017/2018, o lea o lo o faamatalaina ai le tulaga o le tofo lea sa fai ia tatou talo, le talo lea Samoa 2 ma le talo lea Tanumalamala. O lo o matauina ai, e tutusa lelei le taste o... e 5 ia tofo na fai. Ae tutusa lelei taste o talo ia e 2 le talo Samoa 2 ma le talo Tanumalala. O lea e tatalo atu ai faamolemole, pe le toe tagai e faatau mai atili le tatou talo lea Tanumalala, ae faafetai mo tiapula sa tufa atu.

FOFOGA FETALAI: Tulai mai le Minisita e faaauau le saunoaga.

Tofa Hon LOPAOO NATANIELU MUA: Faafetai tele mo le faauilavea faafetai foi i lau Afioga Afoa mo le faauilavea, ae manaia foi le fautuaga. Ae o lea ua faafofoga atu le Minisita o tupe i lau tuualalo. O le tulaga e pei ona saunoa i ai le sui usufono mo Falealili, o le faafitauli lava lea e maua i le talo Tanumalala, a tele lava tama a le tamai talo pe 2. O le faigata ia, e le pei o le talo lea e i ai nei, o le Fusi ma le Salani, ma le talo vave lea e tau o le 4 masina. O le tele ia o tamai talo. O lona uiga la ae faapea e o uma foi e faaaoga.... e lelei mo i latou malolosi aua e mafai ona totoina le 50 eka i le taimi e tasi. Ae o nai fai faatoaga laititi, e fai si faigata, aua a fai nei ae leai ni tama a talo e toe produce ai, ae o lea e ave le talo i fafo ave ma le tiapula, e fai la si faigata o le toe maua o le mea toto. Ua ou faalogo atu i le fautuaga o la foi e faafofoga atu le Matagaluega i le fautuaga e pei ona tuuina mai. Ae sao o le taste o le talo lea na fai nei, ae ou te lagona e le i fai se isi taste na i ai le talo vave lea e i ai nei, e fai foi si manaia. Ae o lo o taumafai pea foi, o le tele foi o le talo lea na alu atu nei i le vaiami lena o le stimulus, o le talo

vave. O lona uiga ua toeitiiti ane lava ona faateleina foi lea o le talo lenei i totonu o le tatou atunuu. Ua oo i Savaii, ua faapena foi se vaega o le tatou motu lenei o Upolu, e le i oo i ai le talo lea. O lona ua uma ona e silafia le mea lea ua fai i tatou pole fagota. O pole fagota sa i ai.

FOFOGA FETALAI: Ou te faamalie atu i le Minisita o Faatoaga se i tulai mai le Minisita o Tupe.

Afioga Hon Sili Epa Tuioti (Minisita o Tupe): Lau Afioga i le Fofoga Fetalai, o lea ua talanoa i le tualga tau Faatoaga ma Faigafaiva. Atonu o se avanoa foi lenei e faamalamalama atili ai le tulaga lea o le vaegatupe lea na aumai e le World Bank, po o le IDA faapea foi le IFAD, o lenei Pololame e 5 tausaga e faafoi ai. O le SAFPPROM, o i latou o lo o fesoasoani mai, o le World Bank e US\$20 miliona lea ua aumai, o le IFAD e US\$3 miliona, o le latou sao lea i totonu o le Polokalame lenei, i le tulaga lava lea o le uunaia o faatoaga faapea le tulaga o Faigafaiva. Faamolemole lau Afioga talu ai le 5 tausaga, o le tausaga muamua lenei, e \$11 miliona lea e i totonu o le Tala o le tupe. O le vaegatupe lena ua faaagaga lava mo galuega lea o le a faatino mo le tausaga lenei. E le o aumai atoa le tupe, e auauai mai e le faletupe o le World Bank po o le IDA. O le IDA, e tusa o le lala lena o le World Bank, e latou te aumaia fesoasoani ia e leai ni tului. O fesoasoani faapitoa mo atunuu tau atiae. O le tulaga la o lo o i ai, o lea ua aumai le \$11 miliona lea e le World Bank e faatino ai a tatou galuega i le tausaga faale-tupe lea e agai atu i ai. E faapena foi le IFAD e \$1.2 miliona lea ua aumai e faaagaga mo le faaogaina i le tausaga faale-tupe fou. O lona uiga, o tupe nei, e moni e US\$20 miliona le tau o le... le vaegatupe lea e aumai i le World Bank, ae o lea e auauai mai. O lona uiga o le \$20 miliona, a liliu i le tala Samoa, masalo ua oo atu i le 50 pe lata i le \$60 miliona. A o le taimi foi lele, e le aumaia atoa le tupe mai le World Bank, e aumai i le 5 tausaga. A o le tupe lea e \$11 miliona o lea ua i totonu ole Tala o le tupe, e faapitoa lava i galuega e faatino i le tausaga faale-tupe lea o le a tatou o atu i ai. E faapena foi le vaega tupe lea e aumai i le IFAD, o le tulaga lena o lo o i ai. O le tele o le tupe, o la ua uma ona malilie i ai, o la ua saina feagaiga. A o tupe ia e aumai i totonu o le Tala o le tupe, e faapitoa lava mo le tausaga faale-tupe lea o le a tatou... e aoga la i tulaga ia, lea e saunoa i ai nisi o sui mamalu o le Palemene. I le tulaga o le atinaeina o Faatoaga ae faapena foi i Faigafaiva. O le SACEP lea na i ai, e le i lavea ai ia tulaga ia o Faigafaiva. Ae talu ai foi le talosaga a le Minisita ma le Matagaluega o Faatoaga, lea na toe fai ai feutagaiga ia ma le World Bank ma le IFAD, o lea ua malilie mai e tatau foi ona fesoasoani mai i le atinaeina o faigafaiva o le atunuu. Aemaise lava le tulaga lea, e le gata i le food security, aemaise lava le faamoemoe lea o le atunuu, ia faapea ona tele a tatou oloa, e auina atu i fafo e fesoasoani ai foi i tatou foreign

exchange. O le faamalamalama lenei ma faaopoopo atu foi i le saunoaga a le Afioga i le Minisita o Faatoaga.

FOFOGA FETALAI: Malo faafetai.

Tofa Olo Fiti Afoa Vaai: Lau Afioga i le Fofoga Fetalai, e fia momoli lava lau faafetai tele i le Afioga i le Minisita o tupe. Malo faafetai o lea ua e saunoa manino i le tulaga e pei ona tatou felafolafoai ai i le vaega lea. E pau lava le concern a le itumalo lenei o Salega i Sasae, o le le tuua o le fesoasoani lea mai le IDA, i lalo o tupe a le Malo i totonu o le tatou budget. O lea ua manino mai o lea ua taoto mai ai i, le tupe lea mai le IFAD. A o le IDA, e le o aumaia i totonu. Sa ou tilotilo foi i le supplementary nei ia Fepuari, sa faapea e aumai ai, aua o le tupe sa talia i le aso 2 Iulai 2019. O lea ua atoa le tausaga e le i toe tuua mai lava se i tilotilo le atunuu, i lenei tupe tele manaia, ae po o fea o i ai.

FOFOGA FETALAI: Tulai mai le Minisita o tupe,

Afioga Hon Sili Epa Tuioti: Lau Afioga i le Fofoga Fetalai, o le World Bank ma le IDA o le Faalapotopotoga lava e tasi. Ae pei ona ou taua, o le IDA, o latou na e aumai ia tupe ia e fesoasoani ai ia i tatou e leai se tului. E le pei o isi atunuu e fai nonogatupe mai le World Bank e i ai tului e maualuluga atu, e fua lava i le gafatia o tamaoaiga o atunuu. Aemaise lava atunuu laiti e pei o tatou, lea la ua tatou maua ai le vaegatupe lea. Ae o le World Bank o le IDA lenei. Ae tatou te momoli foi le faafetai i nei Faalapotopotoga o lo o alolofa mai ma fesoasoani mai, i le faatupeina o atinae o lo o ave ai le faamuamua o le tatou Malo ma le tatou atunuu. Ma le faaaloalo lava.

FOFOGA FETALAI: Malo...o le a se mea o...

Afioga Afoa Amituanai Faleulu Maui: Lau Afioga i le Fofoga Fetalai, o lea ua taua e le Minisita o Tupe le mataupu taua lea i le Polokalame lea o le SAFPROM i Savaii, lea na tatou o ai i le tatalaga o le program lenei i le fesoasoani i le faiga faatoaga ma mea faapena. O le tulaga lea e tupu nei, o faafitauli o le program lenei, e i ai contribution foi ia a nai tagata. A faapea e 5 afe lau...

FOFOGA FETALAI: O se mea e fia faamalamalama pe o se mea e fia faasao? Aua o lea o le a e toe saunoa.

Afioga Afoa Amituanai Faleulu Maui: E fia faamalamalama faamolemole.

Tofa Hon LOPAOO NATANIELU MUA: Lau Afioga i le Fofoga Fetalai, e tele lava le ava, a o le mea lea ua fai nei, e le i taua i lana saunoaga autu

FOFOGA FETALAI: O le faalavelave lena.

Afioga Afoa Amituanai Faleulu Mauli: O le Minisita o Tupe lea ou te talosaga atu i ai,

FOFOGA FETALAI: E leai la,

Afioga Afoa Amituanai Faleulu Mauli: Ia faataua ia le contribution foi ia a.....

FOFOGA FETALAI: Malie foi oe le uso, lau Afioga le sui usufono mo Palauli i Sisifo. E te le faauilavea i le faasaoga a le isi sui. O le faasaoga ia o la e fesoasoani mai o le faamalamalama e le Minisita o Tupe. Ae o le saunoaga lea e fai nei, o le saunoaga a le Minisita mo Faatoaga. Vagana p se mataupu i le Ofisa o Faatoaga, ae o lea la e leai, o le Minisita o Tupe, e le talia la. e le talia le avanoa ua tuuina atu. Tulai mai le Minisita o Faatoaga e saunoa.

Tofa Hon LOPAOO NATANIELU MUA: Faafetai i lau Afioga,

FOFOGA FETALAI: Malie lau Afioga i le Minisita, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E masalo e taua tele le mea lea sa saunoa i ai le Minisita o Tupe, e tataua ona malamalama lelei i ai, ona e laititi lava le eseesea ae tele ai le taimi alu vale o le Palemene lenei. I mea ia o le Faalapotopotoga lea e tau o le Faalapotopotoga a le Faletupe o le Lalolagi, e i ai la lala nei, lea e saunoa i ai le Minisita o Tupe, o lea e faaauuala mai ai i i, i lalo o le IDA, ia vaegatupe ia e talanoa i ai. E i ai la taimi e alu atu ai le faamatalaga, ua alu atu i le vaega i luga. Ae o lea la e auiliili atu i lalo ma faamatala atu le IDA, ae le o faamalamalama. Ai e faapea e ese le IDA, a o fea la le tupe lea na aumai i le World Bank. O le IDA lava lena.

Lau Afioga i le Fofoga Fetalai, e tele ai le pisa i totonu o le Maota, ona e le i maua mai, o lalo o le World bank e i ai le IFC, World Bank group uma lava lea, e i ai foi la ma le vaega lea o le IDA. E pei la o lea ua faamatala mai manino, e ese lava le IFC, o le faalapotopotoga lena, e sau ai nonogatupe e

fai ai atinae tai piliona, 2 piliona. E sea sea ona maua se atunuu iinei i le pasefika e mafai ona faatupe mai e le IFC. Ona e faitau piliona ma piliona mea e sau ai, a o i la i le IDA e auala mai ai la le vaega lea. Mo tamai atinae nei e le oo i se pilona, o isi atinae tetele e oo i le fia piliona. O le mea la lena e sulufai i ai tama tetele, ae tetele foi la ma tului. Ae o le mea lea o le IDA e i ai lava le vaega lea e matua maualalo lava, pe aumai foi le fesoasoani e aumai fua, pe 1% foi pe i lalo ifo o le pasene. O lea la na ala ai ona...ona o le faitioina o le IFC, ona faatuina ai lea o si tamai lala lava, i le latou facility i Ausetalia. O lea la e auala mai ai le faatupega o isi tatou poloketi, pe miliona pe i lalo ifo o le miliona, lea na faatupe mai ai, le hotel tele la e i tua i Siumu, ma na i isi poloketi. A o le lala o le IFC e ese foi le taua o lona igoa, o le facility lena, ua ou le iloa po o le South Pacific facility ea. Ina ia mafai ai ona auala mai lalo o le IFC, e pei la o feeseeseaiga ia, o lea ua aumai tonu lava e le Minisita o Tupe ma le fesili soo po o fea la le tupe lea na lolafola mai ai le Faalapotopotoga, ae o le Faalapotopotoga lava e tasi.

O lea la ua ou toe tulai atu ai e momoli atu le faamalo i le Minisita o Tupe, i lona puepue maia o le vaega lea e tu mai ai nisi ma taufesili.

FOFOGA FETALAI: Malo, ia tulai maia lau Afioga i le Minisita o Faatoaga.

Tofa Hon LOPAOO NATANIELU MUA: Ia faafetai i lau Afioga i le Fofoga Fetalai, e i ai le faauilavea o la ou te talanoa i le aufaifaiva. Ia ma e o tulaga o fesoasoani e faapea ona tuuina atu i le Matagaluega o Faigafaiva i lalo o le Matagaluega o Faatoaga ma Faigafaiva, o lea ua uma ona faailoa atu i a tatou aufaifaiva ma le autautai.

Ae faatasi ai ma le fesoasoani a le Afioga i le Minisita o Galuega ma le Matagaluega o Galuega. I le tulaga foi lea mo le toe laiseneina o vaa mo taimi e atoa ai le tausaga ia ona toe i ai se latou fesoasoani, faafetai tele i le Afioga i le Minisita ma lau Matagaluega, ona o mea uma lava na e i ai le latou sao tele i le tatou vaega o Faatoaga ma Faigafaiva. Malo lava faafetai.

Ia o pole ia na talanoaina, ae e le i tua atu o le vaiaso na tea nei, sa i ai pole i Apia, Aleipata Siumu ma Palauli. Ia o lea ua faamaonia mai na faapipii le pole a Poutasi i le vaiaso lenei. Ia ae o lo o faagasolo Falefa, o Faga ma Leulumoega, Safotu, Salailua ma Asau. O nuu la na o lea ua faamoemoe e ave i ai a tatou pole fagota. E a foi... e fesoasoani ai foi i le au tautai, ina ia faafaigofie a latou galuega e faia i luga o le sami.

Ou te fia tautala laitiiti i le vaega ia o tatou vaa ia e omai e tranship i luga o le uafu i Matautu. E tasi le Kamupani ua fai ia le latou feagaiga ma lo tatou Malo, e a foi e latou te afea le uafu i Matautu, mo le fesuaiga mo le lauina o latou ia i fafo. O vaa nei, e le fagota i totonu o le tatou ogasami, ae e fagogota i ogasami o isi atunuu o le Pasefika lata mai, ona malaga mai lea i Samoa nei e tuu ia le latou uta iinei, tuu i totonu o container ia ma ave ai i

fafo. O le vaa laitiiti e 60 tane, e latou te faaaluina se tino i tupe i le va o le \$15,000 i le \$30,000 i taimi uma lava e omai ai i totonu. O vaa lapopoa atu e 120 i le 150 tane e feoloolo atu le seleni, ia o vaa ia e tau o le Pisaina, ia o vaa lava na e latalata i le \$50,000 ae a oo la i le taimi e utu ai vaa nei, ia o vaa nei e tai 60,000 lita e utu ai ai tamai vaa nei e 60 tane ae o le Pisaina, a utu i inei, ia e utu i le 360,000 lita.

O le taimi la nei, e le i mafai ona tatou utuina se vaa lapoa faapena ona e fuafua i le tatou suauu. Ae ui i lea, o lo o fai pea le feutagaiga ma le kamupani ma i latou o aumaia ia vaa, o se taimi o i luma pe a lelei foi ia le tatou supply o le tatou suauu, ia ona mafai lea ona fai o lona tulaga. Ia ae o tupe lea ou te fai atu ai, e alu ma faatau ai meaai, o a foi o fua o faatoaga, o oloa o le faleoloa, ia o le tupe e totogi i a latou agents lea e i inei, ia faapena foi ma le tupe e totogi i le Matagaluega o Faatoaga ma Faigafaiva ma le SPA, o le tatou Pulega o le Uafu, o le aoga la lona ma le sao o lona Kamupani. I le tausaga lea na tea nei 2019, e \$12 miliona le tupe na faaaluina mo gaioiga faapena sa faia i luga o le tatou uafu. Ae e i ai le faamoemoe o se taimi o i luma pe a tele ni a tatou o le... taimi o i luma o lea ua i ai le polokalame o le a faatuina se latou fale e process ai le latou ia i tai i le uafu, ia o lona uiga la, e le toe avea o se transshipment, ae e tau o le export mai ia tatou. E fai la sina.... a fuafua i ai i le tele o le ia lea na ave e le Kamupani i fafo i le taimi lenei, e ono vaai tatou i le \$100 miliona a le kamupani e tasi, e latou te aveina atu i le tatou... mai Samoa, ae o le a treat foi o se export a lo tatou atunuu.

O le faasao i Lefaga, e pei ona saunoa ai le afioga i le sui usufono mamalu, e molimauina lava le lelei o le tausiga o le tatou faasao, ma ua i ai foi ia taimi e lelei ai turisi, ua fai foi ma o i ai ia tatou turisi e matamata ai i le tatou faasao lea o le faisua. O le molimau mai lea a le Matagaluega, e momoli atu ai le faamalo i lau Afioga ma le itumalo, i le mafai ona tausisia o aiaga e pei ona faapea ona faataatia atu e le Matagaluega, aua le faaleleia o lea vaega o le tatou auunaga.

Floating jetty mo Falealili, o lo o tilotilo pea le Matagaluega i ai, o lea ua maua ua vaaia foi i inei, ua maua ai mo mea o floating bags ia atonu e mafai ona maua ai se fesoasoani. Ae o le taimi lenei se i auiliili aua leaga o lea faatoa amata ona faagasolo talosaga o le SAFPRM, ia se i vaavaai foi i ai le Matagaluega pe o le a se vaega, o le a se itu e faapea ona agavaa ai le tou talosaga mo se tou floating jetty ae ua uma foi ona tilotilo le Matagaluega e sao. E faigata tele ona fai se uafu i o i le tou... i le la vaega o le tatou atunuu.

A o ramps, ia ua uma ona fai le ramp i Siumu. Oi o la ua amata ia le galuega o le ramp a Siumu. Ua uma foi ona faatino ia ramps i o i le Aiga i le Tai, e pei ona oo mai ia talosaga a afioga i sui usufono, ia o lea foi ua tou fesili ai, ia, o polokalame e mafai ona faaauau. Ia ae...

FOFOGA FETALAI: Tulai mai le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai e na o sina tuualalo i le Minisita, o mea ia o ramps, ma mea ia o floating jetty, ae a pe a se i faa-Samoa mai? Se i silafia ai e le aufaifaiva i tua po o a na mea? O lea ua faalogo mai o le a ave ia Siumu ae faapefea latou? E pei lava e lelei ona faa-Samoa mai mea ia, ia malamalama ai ia tatou i nuu i tua, ne i te i ua faafogafoga mai ua tele mea i lea itumalo ma lea itumalo ae o la foi e fia maua e latou ia tulaga ia.

Lau Afioga i le Fofoga Fetalai, e taua tele ia vaega nei, ina ia faasafua i ai latou o lo o faagotaina le tatou gataifale.

FOFOGA FETALAI: Tulai mai le Minisita.

Tofa Hon LOPAOO NATANIELU MUA: Faafetai i lau Afioga mo le... ia o le ramp o le mea e toso vaa. E toso ai i luga vaa alia o nai faapea o le aufai paopao. Ia a faapea e o atu la ua i ai le taligalu foi, ia ua faigata tele ona tau oso atu i luga o le gaoa toso atu i luga o le gaoa vaa. Ia o lea la ua fesoasoani mai le Matagaluega i itumalo e pei ona taunuu mai latou talosaga, e fai ia latou nofoaga toso vaa e toso ai o latou vaa i luga ma lalo.

O le floating jetty o le tamai uafu foi lea e le mau ae faaopeaopea.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, o se mea e fia faamalamalama ma le faaaloalo...

FOFOGA FETALAI: Ia se i tulai mai se i tulai mai le sui usufono o Aleipata Itupa i Lalo,

Afioga Tafua Maluelue Tafua: Faafetai i le fesili a le Palemia ua ta malamalama atu ai i le uiga o le upu lea o le ramp. Ia ae o la foi e faafogafoga mai ia si ou itumalo, se e manaomia lava ia ni nai mea ia ae seia oo ia i lea tausaga, ou toe talosaga atu i lau Afioga. Ae o lea ua maua atu, o lea e tufa mai e le Malo pe a o i ai se tatou tupe o totoe, se manatua ane si o matou itumalo e tele mo le ala la e i ai e le sao ai paopao. O si ou paopao la e taatia ou te manumanu te i ua avatu tae i lalo. Ia ae a maua mai la sina fesoasoani, ia ma le agaga faaaloalo, faafetai lava.

FOFOGA FETALAI: Malie se i tulai mai le sui usufono o Siumu.

Afioga Faalogo Iosefa Sopi (Siumu): Faafetai i lau Afioga mo le avanoa. Ia e fia molimoli atu le agaga faafetai tele i lau Afioga i le Minisita, mo le ramp o Siumu. Ae na ona faamanatu atu le... sa talosagaina foi ia le pole lata mai lea mo le aufaifaiva i paopao faamolemole i lau Afioga i te i ua galo, faafetai.

FOFOGA FETALAI: Malo, ia se i tulai mai le Palemia.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai o se mea e fia faamalamalama, e le o le uiga o lau fesili, ia taofiofi mea na fai ia Siumu. Leaga o Siumu lea na muamua iloa le nanu lena, faamuamua pea la Siumu. Ia ona sosoo ai loa lea ma Aleipata Itupa i Lalo, ia ae aua le avea se mea i nisi itumalo e latou te le manaomia. Aua o lea e le o talanoa mai i ai ia latou sui usufono.

Tofa Nafitoa Talaimanu Ketu (Gagaemauga Nu.3): Lau Afioga i le Fofoga Fetalai...

Susuga Mulipola Leiataua Laki (Aiga i le Tai): Lau Afioga i le Fofoga Fetalai...

FOFOGA FETALAI: Ia se i tulai mai le...

Tofa Nafitoa Talaimanu Ketu: O lea e tusitusi lava le... O le itumalo lena o Gagaemauga Nu.2 o tagata fagogota. O lea ou te talosaga atu ai, o lea ua maua le avanoa ma le saunoaga matagofie a le Taitai o le Malo, malie lau Afioga, e manaomia ni ramps se lua i Matautu.... tagata fagogota pe a tusa ma... ae o lea o le a faaoo atu talosaga i le Aso Gafua.

FOFOGA FETALAI: Ia, malo...

Tofa Aumua Isaia Lameko: Lau Afioga i le Fofoga Fetalai....

Susuga Mulipola Leiataua Laki: Lau Afioga i le Fofoga Fetalai, sina avanoa...

FOFOGA FETALAI: Ia, o le a toe tutu mai e le i taua i a tou lauga faalauaitele. Ia se i...

Susuga Mulipola Leiataua Laki: Ia lau Afioga i le Fofoga Fetalai ia a tatou talanoa loa i le gataifale ia e le tau avatua se tala o le Aiga i le Tai o le latou lea tofi. E faafetai i le Afioga i le Minisita i le tulaga i toso vaa ua uma ona tapena mo lena afioaga ma le itumalo, o lo o faaauau nisi o toso vaa. Ae e na o se faamanatu, ia e faaopoopo i le faafetai, ona e i ai ma le isi talosaga a lou itumalo na faaopoopo atu ai i tulaga ia tatou marine lights foi ia, nai moli foi lea e tau tatai mai ai i totonu ia vaa, ona e faaletonu lava tulaga i le alavaa. O lona uiga e manaomia nai moli faapena, ia o lo o

faagasolo foi la i ai ia galuega a le Afioga i le Minisita. E momoli ai le faafetai, ia atonu foi e aoga i nai sui usufono ia faatoa faalogologo mai e faaopoopo i a latou talosaga fou. Manuia lenei aso.

FOFOGA FETALAI: Ia, malo, aua le feoai po pe a maua se moli.

Tofa Aumua Isaia Lameko: Lau Afioga i le Fofoga Fetalai, ia o se mea e fia faamalamalama.

FOFOGA FETALAI: Ia tulai mai ia le sui usufono o Falealili.

Tofa Aumua Isaia Lameko: Faafetai i le afioga i le Minisita, faafetai i le Afioga i le Fofoga Fetalai mo le avanoa. Na ala ona matou talosagaina ia le uafu lea e opeaopea po o le floating wharf ia, ona o lea ua i ai le isi atinae fou lea i le motu lea o Nuusafee. E pei o i lea e faaoga e o ai turisi agai i tai i le motu. Ia ae le gata foi i lea, ia e faaoga foi mo tatou vaa fagota, ia ma paopao. Ia ae o lea ua maea foi na i ai le ramp ia po o le mea toso vaa lea, i si o matou afioaga i Poutasi, faafetai tele i lau Afioga.

FOFOGA FETALAI: Ia, malo faafetai. Ia, faaauau le saunoaga a le Minisita.

Tofa Hon LOPAOO NATANIELU MUA: Faafetai i lau Afioga i le Fofoga Fetalai, ia o lea la e... ia aua o lea ua vaai atu ua tau mai ma le turisi, e afa la ou te tali atu ai, afa e tali atu ai Sala.

FOFOGA FETALAI: Faaopoopo ifo ai ma se toso vaa a Fasitoo uta. Aumai ni nai mea se... e le tele e na o le 4 ni nai ramp.

Tofa Hon LOPAOO NATANIELU MUA: O le mea moni lava ia e fai uma mea ia na e tou te fai mai ai, tou te saunoa mai ai. Ae pau lava le mea lau Afioga i le sui usufono mamalu le Sui Fofoga Fetalai, e le tau faia se ramp i lou afioaga. A tou vaai i le mea lea e alu atu ai le vaitafe i ina i Saleia, e toso ai lava i ina ia tou vaa. Ia ae e le afaina o le a faapea ona tilotilo i ai le Matagaluega, ae o lea ua ou faaataata atu i lau Afioga i le Ofisa Sili o le Matagaluega, sei tusia ma faamaumau uma i lalo mea ia e pei ona laga mai leaga e le mafai ona ou tautala ma tusi. Tusi uma i lalo ia finagalo o afioga i sui usufono mamalu.

Ia o le a foi o le masini aisa a Siumu.... O le mataupu lenei sa matou feutagai ai ma sui o le aufaifaiva o lo outou itumalo, ia ma Siumu. O lea ua faamatuu atu le aisa, i le aufaifaiva a Siumu, ona o le manatu lea, o le tele o taimi, e uma le credit o le cash power, ia pe uma le tupe o le mita, ia e tau sau le

tagata i inei e avatu le... tau valaau mai i le Matagaluega e faapena ona avatu se tupe e totogi ai le Matagaluega e totogi ai le cash power.

O le ala la lea ua faamatuu atu e lisi ia Siumu, ona o latou lea e vaaia, ma latou vaavaaia faalelei le tausiga o le fanua lea ma le aisa, e sefe ai foi le toe faamoemoe... o isi taimi na taua mai e ta le 12:00 i le po, ae valaau mai Siumu i le Pule o le aufaifaiva, faamolemole e sau se isi e aumai se cash power. Ia o tulaga la lena ua ala ai ona fai, e faafaigofie foi i le tatou vaega foi lea o le Board foi lea o le Revenue Board ona faamatuu atu, o lea la ua tuu atu ia te outou e tou te vaavaaia le tulaga lea lau afioga i le sui usufono mamalu. Ae e tatau ona outou galulue faatasi ai i lena mea.

Sa taua e nisi o sui usufono vaa fagota o lea ua i ai ia le polokalame lenei a le SAFPROM lea e i ai le Fisheries e le o... o lo o faatino ai le design o se supa alia fou, e i luga atu o tatou alia lea e i ai nei, ona o le matauina ma le fautuaga a le Matagaluega, ua tatau ona mafai e o tatou faifaiva, ona soso atu laititi i gatai atu o le 25 maila lea mai le gataifale lea e fagotaga ai.

Ia o le ala la lena ua tilotilo ai, silasila le Matagaluega faapea foi i ai latou o lo o fautuaina, e fai sina vaa fagota lapoa atu o lona tau e fuafua i le taimi nei, e \$200,000 i le \$300,000. Ia o le faiga lava lenei o nei mea o le tele o se mea, o le tele foi lena o le tau. E le mafai ona tele le mea e manao ai, ia ae manao e faatau i le \$20.00. Ia o le tulaga la lena o lo o faia pea ia feutagaiga faatasi ma le Faalapotopotoga o le Asosi o le Aufaifaiva, ma tilotilo i ai ma velo aso i ai ina ia aua ne i aumaia foi, ae faapea mai, matou te le i iloa se mea. O le Matagaluega lava na na fai mai, ia ae o le tulaga lea ua faatino nei, o feutagaiga ina ia mafai ona aumai se vaa, ia ua talafeagai mo manaoga o le aufaifaiva.

O lo o i ai paopao alamini e fai ama e mafai ona fai. O lona tau e \$5,000 ae faaoga ma le afi 15 i le 25 house power. E faapena foi ia vaa pailate alamini e faapena ona faaoga ai le afi e 25 i le 35 house power po o le malosi lena o le afi e mafai ona alu ai le vaa lea. Ia o lona tau, i se mea o le \$15,000 i le \$20,000 lona tau. Ia o fesili na sa tuuina mai e lo tatou Maota nei, o lena ua tali atu.

O lo o i ai ia kamupani e 2 o lo o faatinoina le faamoemoe lea, i le fausiaina o vaa alamini mo fagotaga. E le o i ai se kamupani o galulue ma le Matagaluega i le taimi nei, ia ae o le mea lava ia, ia faapea e sau le tagata e talosaga mai i lalo o le SAFPROM i size o le vaa e manao ai pe a faapea foi e faamalieina talosaga, ia pe a faapea foi ua faaavanoa le tupe, ia e mafai ona alu lava ia e vaai lana tufuga e sau e na te fausia lona sa.

O le afioga ia Toomata sa saunoa i le tulaga lea o le mechanisation po o le faaogaina o masini i a tatou faatoaga. O le tali i lau afioga, ia e o atu foi fai suesuega a le Matagaluega. E le i i ai se poloketi \$10 miliona Amerika o i totonu sa faatalanoaina, ae e na o le poloketi e \$3 miliona Amerika sa faapea ona fuafua. Peitai ane, o tulaga masani ai o le aumaia o le fesosoani i le Malo o Saina, e le i mafai ai ona faatuina lea faamoemoe ona, e i ai le counterpart

finance e manaomia po o le tupe e mafai ona avatu e le Matagaluega ma le Malo, e faalua ma le seleni e maua mai ia Saina. Sa fai foi le suesuega a le Matagaluega i lenei taimi, e fai sina taugata, e tele le sao o le Malo, ona e fausia fale, e manaomia ia tagata faapitoa inisinia, ia ae tele foi lava o masini nei a Saina, e le i oo mai i totonu o le Pasefika. O le tele lava o excavators ia e aumai, e aumai mai i Iapani, aumai i fea foi i South Korea, ia ae leaga o tulaga lava faapea e fund e Saina, e aumai mai i Saina le masini, ae o aiaiga na, e tataua ona i ai ni tagata i inei e latou te vaaia atinae.

Ia ma le isi foi mea lau afioga i le Fofoga Fetalai, ia e le po foi se lilo, o au nei ua leva ona ota i totonu o le taaloga lea. Ae ou te tautino atu i lau afioga, e le faigofie, e le faigofie mo le Malo. Ma e silafia foi, o le mea lea na ala ai ona faamatuu ese e le Malo ia le Public Works, i isi aso i taimi ua tuanai, ona o le aloese ma le... o le matafaioi lea a le Private Sector.

Ia o le tulaga lenei lau afioga e tali atu ai ma le faaaloalo, e le i i ai se polokalame, sa faapea ona faamautuina mo le fuafuaga. Ou te...

Afioga Sulamanaia Fetaiai Tauilili Tuivasa (Vaimauga Sasae): Lau Afioga i le Fofoga Fetalai o sina.... faasaoina o le taimi o le afioga i le Minisita, leaga sa taua i lau lauga...

FOFOGA FETALAI: Malie le Minisita se i tuu atu i le...

Afioga Sulamanaia Fetaiai Tauilili Tuivasa: Ou te momoli le agaga faafetai i le Afioga i le Minisita, leaga o lea ua oo ifo i masini, ia pe sa taua i le lauga a lenei itumalo, e pei foi ona ou taua o le itumalo lenei e tele ia o le tatou atunuu e o atu e aumai le tuitui, o le fagu vaga, o le sea. E le o po la se lilo i si o matou afioga foi lea o Fagalii o lo o i ai le faasao. Ia e pei la ona avatu ai se talosaga, ia e mataulia foi o afioga nei o lou itumalo, e tele ia o vaitafe. Ia ua sau nei la le vaitafe e pei ua tanumia ai ma ua pala ai le gataifale, o lea sa avatu ai le talosaga, se i silasila ane, pe e le mafai ona toe i ai se atinae o lau Matagaluega e toe toto ai le amu, leaga o le matafaioi lenei a lenei itumalo i Vaimauga Sasae e tele le tulaga lea e maua mai ai, i le mataiaai ai lea o lo o fiafia ai ia si o tatou atunuu.

Ia leaga o lea ua see ese mai i le tulaga lenei e pei ona taua i lau lauga, o le tele o vaitafe ia ae o lea foi e i ai le faasao i totonu o si o matou nuu o Fagalii, se i toe silasila ane. O le amu lava lea e popole ai e pei ua sola le tulaga lea i si o matou nuu, o le sea, o le fugafuga. Sa teena foi e lenei itumalo ia le tele o le vaega lea sa o atu e latou te manao e faatau le maisu. Ia o le tulaga lenei o le faasaoina o le gataifale o lenei itumalo. E pei o le agaga lenei e toe avatu ai i lau Afioga i le Minisita.

FOFOGA FETALAI: E sao lelei le sui usufono, aemaise lava le nuu lea o Fagalii. Se i tulai mai le...

Susuga Hon Laauli Polataivao Leuatea: Lau Afioga i le Fofoga Fetalai, mo le faasaoina o le taimi o le Minisita...

FOFOGA FETALAI: Faamolemole se i tulai mai le...

Susuga Hon Laauli Polataivao Leuatea: Ou te tulai atu ma le agaga faaaloalo, o lo o talosaga mai ia le tatou Asosi lau Afioga i le Minisita o le aufaifaatoaga a Salafai, se i tuu atu i ou tafatafa le talosaga e 12, au Agro Business, faamolemole e le i afea i lau lauga ma le agaga faaaloalo, a lea e valaau mai faamolemole, 12 talosaga a le tatou aufai faatoaga i Savaii o lo o poloka i lalo o le Agro Business. E momoli atu ma le agaga faaaloalo se i oulua silasila ifo ma le Minisita o Tupe, masalo o lea ua faafia ona omai nai toeaaina ae o le a lafo atu ma le agaga faaaloalo.

Afioga Tafua Maluelue Tafua: Lau Afioga i le Fofoga o le Fono, malie lau afioga, o lea na ou faalogo atu i le faaiuga o lau saunoaga, manatua Fagalii. Ia ae ou te leiloa o lea e misi ia Sula ona tau mai, masalo o se isi lena vaega o le environment o lo o afaina po o le pamu penisini ea na i Fagalii lau Afioga ma le agaga faaaloalo.

FOFOGA FETALAI: Ia, ou te faamagalo foi ia oe, faamagalo ae faamanatu atu, o le fai misa i le misa ese, e te i lava ua tae ai fua le mata. Ia talu ai ona o lea ua tatou taunuu i le tatou malologa masani, faamalie atu i le Minisita, sei faaauau lea saunoaga pe a tatou foi mai.

O le a faataatiaese galuega a le Fono Aoao Faitulafono ia mo lana malologa masani.

Na faataatiaese Galuega a le Fono Aoao mo lana malologa masani i le itula e 10:29 ma toe amatalia i le itula e 11:17 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.

FOFOGA FETALAI: Ou te faasilasila atu ua toe amatalia Tualumaga a le Fono Aoao Faitulafono. E faia ia le tatou malologa o saunoa le Afioga i le Minisita o Faatoaga ma Faigafaiva ma ou te tapa ma le faaaloalo lau Afioga i le Minisita.

Tofa Hon LOPAOO NATANIELU MUA: Faafetai tele i lau Afioga i le Fofoga Fetalai, ia ou te manatu o lea ua saoiālo le tautega a le Maota nei, mo se faamalositino, aua le faaauauina o le tatou Fonotaga i lenei aso.

E le o toe umi sau folasaga ae na ona ou toe faapai atu i mataupu ia e lua e taua tele o le manu ainiu, e pei ona talosagaina se faamatalaga e uiga i paipa PVC ia e avatu faapipii i niu. O le mailei lena e avatu e i ai ma le vairusi e tuu i ai i totonu e le Matagaluega, ia e feleleai lava le manu ainiu ona sau lea e oso i ai i totonu, ia ma faapena lea ona aumai i le Matagaluega e a foi... e manaomia foi le fesoasoani a nuu ma afioaga, e ao mai. O le isi mea a tou silafia o le tele o le vaega i le fanua lea sa i le SLC lea ua nofoia nei e tagata, o le faatoaina o fanua na, ae e tele le laau na pauu, tele le niu. O le mea la ua tupu, o le tele ia o le manu ainiu o le mea foi lena e mafai tele le vaega lea o le tatou atunuu i le faamai lea o le manu ainiu.

E manaomia lava le faamamaina o tatou laueleele. Ia e talosagaina ai foi ia le mamalu i le Afioga i le Minisita o Pulenuu ina ia silasila ane i le tulaga lea o le faamama ese o laau. O lea foi ua fesoasoani atu i nai nisi iliafi e avatu, e aloaia ai le faamoemoe e i ai se isi taimi lata mai e maua ai nisi iliafi faaopoopo atu e pei o le galuega lea e fai e Satapuala ma nuu ia, ua manaia lava le faamamaina o latou laueleele.

Ae o le tulaga i le vairusi la lena, o la e alu atu le vai i le isi... o le male, alu ai, alu i luga ia feiloai ma le paaga ia faapena ona aafia ai ma lena. Faapena foi le fungus lea e maua aua o le manu ainiu lea e aumai i totonu o le Matagaluega, e aumai ona vili lea, ona avatu lea e fai ai le fungus. Se i uma ona fesili lea i le Ofisa Sili po o le a le Faa-samoa o le fungus, ia ae e pei o se siama. E pei o se ma faapena. Ia, ui i lea, e na ona faamalalama leaga o lea sa i si fesili ananafi i le tulaga lea, ae e manaomia tele lo tatou galulue faatasi, i le faamamaina o tatou toganiu i oganiu vae atu le Maota nei ma le faafogafoga a Samoa, faalalo ma faapoloka ma faaputu e pei ona i ai le masani o le faiga o tatou manu ainiu.

Ona oo mai lea o se faamatalaga i le tulaga o le tatou fiva Aferika mo meatuaolo. O le tulaga ua i ai le faamai lea, ua oo mai i Papua Niu Kini, sa i Asia ae amata mai i Aferika, e pei ona avatu foi se faamatalaga i se taimi o mavae. Ae o iinei i Samoa e le i ai i le taimi nei, ae ua sauniuni e pei ona i ai le masini ua aumai e fai ai ia le tatou suesuega i a tatou meatuaolo, ne i mea ane ua maua mai ia le faamai lea i totonu o le tatou atunuu, ia ae o la e i ai se masini e mafai ona fai ai suesuega.

Ia o lea e mafai ona faaāoga mo le suesueina o le Koviti, e mafai foi ona sue ai le DNA. Po o a lava galuega faapena e mafai ona fai, e manaomia, o la e i ai le masini la e i uta i le SROS. O le mea foi lena e tau popole ai lava i se isi taimi le taofi lau Afioga i le Fofoga Fetalai, a tulai soo mai le Afioga ia Afoa i Palauli, se ou te tau popole lava pe le o le mea o maua i le fiva lea. Ia ae ui i lea, o lea la ou te tau fai atu i lau CEO o le SROS e faamolemole e vaai ifo le toaina lea pe le avatu e muamua test ai i le mea lea.

Lau Afioga i le Fofoga Fetalai, ua maea ai i le folasaga a le matou Matagaluega. E momoli atu le faafetai i lau Afioga ma le mamalu o le...

Tofa Namulauulu Sami Leota (Faasaleleaga Nu.2): Lau Afioga i le Fofoga Fetalai...

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Ua maea le saunoaga a le Minisita.

Tofa Namulauulu Sami Leota: Faafetai, o sina mea laititi lava lea leaga o lea sa taua i lau lauga le tulaga lea i tatou talo foi ia e ave i fafo. Ia o le matou itumalo ua talu ona alu atu le faasalalauga lea a lo tatou Matagaluega i le faamalosia o le talo salani ma le talo meamata, ae o le taimi lenei ua agai atu i le vaega lea e export ina talo. E pei e foliga mai o na ua concentrate lava i le lua ma... e pei ua tau le fuaina le talo lea meamata ae o lea ua tai 4 masina o isi talo tai 6, toetiiti la fua mai i le taimi lenei ae o la ua taofi po o.....

E na o na taatia atu i autafa o lau Afioga i le Minisita, pe i ai se mafuaaga foi ua.... Ia o le vaega lona lua lea sa ou talosaga atu ai lava i le SAFPRO, i se avanoa foi lea e na ona toe faamalamalama atili ai i itumalo mai Savaii ia le tulaga ina ia malamalama lelei i le tulaga e agai atu ai talosaga aua foi le agavaa ma le faaogaina o le tatou polokalame lea. Ma lou faaaloalo faafetai.

FOFOGA FETALAI: Malo, se i....

Afioga Leaana Ronnie Posini (Safata Sisifo): Lau Afioga i le Fofoga Fetalai, faafetai tele lava i lau afioga i le Minisita. O lea ua matau o le a faaiuiu le saunoaga a lau afioga. E i ai lava le mea sa taua i lau lauga faamolemole lau afioga. Mo mea foi ia o mea e ave i fafo o mea e ave i fafo o faaoso o nai o tatou aiga e avatu e ave i Niu Sila ma Ausetalia, ia o lea na matau ai, o lea na ou fai atu o kula ia vae atu le paia o le Maota, e avatu faaleaogaina i Niu Sila po o Ausetalia. O le uiga la o lau tala foi lele, ia malamalama o tatou tagata malaga a o le i faimalaga i atunuu ia, ia malamalama po o a tonu mea o la e faasa mai, aemaise lava Niu Sila ma Ausetalia. Ma le agaga faaaloalo lava.

Afioga Sulamalana Fetaiai Tauilili Tuivasa: Lau Afioga i le Fofoga Fetalai mo le faasaoina...

FOFOGA FETALAI: Malie le sui usufono ua ou faalogo atu i a outou mataupu o mataupu uma lava ia e le i oo i ai a outou saunoaga.

Afioga Sulamanaia Fetaiai Tauiiili Tuivasa: O ita sa laga le fai faamolemole, ona o lea e faalogologo mai si ou itumalo.

FOFOGA FETALAI: Lelei. Ae i ai lava mataupu e fai i tua, e le faapea o mataupu uma lava e faaali i luma i i, ae i ai lava mataupu ta te fesili atu lava ae vili i o i le Ofisa Sili, o le a alii le tonu o le mea lea? Ia a o lea tou te mananao lava e aumai i luma i i? Ia a o le a le mea e le telefoni ai taeao i le Ofisa Sili pe a faapea e uma foi le tatou Fono valaau loa i ai ae se i faauma, o lea ua uma le saunoaga a le sui usufono.

Ia, se i faapuupuu mai lava le Vaimauga...

Afioga Sulamanaia Fetaiai Tauiiili Tuivasa: Lau Afioga e usitai tele le sui usufono, ae pei o le agaga o le itumalo lenei o lo o i ai le tagata e sili ona lauiloa i le mea lenei o le fai Isaraelu, o se tamalii o le matou afioaga o Fagalii. O le ala la lea sa ou taua ai le Afioga i le fai, ia se i taumafai lava o le a se togafitiga e togafiti ai le fai Isaraelu, ma nisi foi fai ina ia atili alu ai pea, ae ona o lea ua uma le saunoaga e le i afea le fai. A o le itumalo lenei, o le nuu lenei o Fagalii, o lo o faafailele ai le fai Isaraelu lea, pei o lea o le a faatuatuanai, ae pei o le agaga lenei o lea sa avatu ai.

Ma le lona lua o le talosaga i lau Afioga i le Minisita, leaga o au lea ou te vaai le Itu lenei Agai, e le o lavea le susuga i le sui usufono lea ia Faleulu i le faamai lea na e saunoa mai ai. E pei o le tulaga lenei, leaga o lea sa e fesili mai po o aafia le sui usufono lea mo Palauli Sisifo, e leai e le o aafia i le tulaga lenei na e saunoa i ai ananei.

FOFOGA FETALAI: Ia, se i faauma mai le saunoaga a lau Afioga i le Minisita.

Tofa Hon LOPAO NATANIELU MUA: Faafetai i lau Afioga i le Fofoga Fetalai, e i ai lava le mafuaaga na ou musu ai ou te oo i le fai. A ua ou iloa a fai atu nei lau tala lea nei, o le a matua va lava le lua fogavaa ma le sui lea e te saunoa mai ai. Ae lelei, na ona ou faapea atu, o le fai Isaraelu e fai sina taugata tele o lona vaaiga, o se mea o le \$4,000 i le \$5,000 i le eka i le masina e maintain ai pe tausia ai. O le tulaga foi la, seiloga o ni tagata e i ai le seleni e mafai ona faatinoina le tulaga lea, ae le o nofonofo le Matagaluega, o lo o silasila pea le Matagaluega i a tatou fai ia sa i ai muamua e toe faaolaola mai o le mea foi lenei ua ala ai ona... tasi lenei mafuaaga na ala ai ona...

Afioga Afoa Amituanai Faleulu Mauli: Lau Afioga i le Fofoga Fetalai...

FOFOGA FETALAI: Malie le sui usufono o lea ua faamaea le saunoaga a le Minisita. Faamaea mai le saunoaga i lau Afioga a le Afioga i le Minisita.

Tofa Hon LOPAOO NATANIELU MUA: Faafetai lava i lau Afioga. O lea foi ua galulue le tatou Fale Suesue i Nafanua i le taumafaiga foi o le tatou suesuega i totonu o le fai lea a tatou, ae onosai mai. Ma le faaaloalo.

Ae o le tulaga i le faafesili a le sui usufono mamalu mai Savaii ia Namulauulu, o le self life o le talo lea sa e saunoa ai, e fai sina puupuu, pei o le mea lena e ala ai ona tau alofia i le taimi lenei e le au vaega o lo o avea le tatou talo i fafo, ona e le umi ae fpala ma aatamaia ae le i faatauina i tatou maketi. E pei o le ala lena ua tau te i ai nai vaega ia e avea le tatou oloa i fafo. A o le mea moni lava ia, o lea e mafai ona ave faa-frozen. E tele le tatou talo tuuaisea la e ave, e mafai la ona taumafai e uunaia. O lea foi e faafofoga mai lo tatou atunuu aemaise o le aufaifaatoaga, afai o lo o mafai ona ave le tatou talo i le tulaga fresh, ona ave lea i le frozen, lena e tele le tatou talo lena ua ave i Ausetalia, aemaise lava Ausetalia lea ua malosai mai nei le tatou maketi o le frozen i Ausetalia, tasi lena avanoa e ave i ai le tatou talo lena lau Afioga, e tali atu ai.

O le i'a mo Ausetalia, e 5 kilo le limit, le tapulaa. E le mafai lava ona ova atu i le 5 kilo le i'a e mafai ona e... a e malaga i Ausetalia, tuu i totonu o le kula, ae manaomia foi la le pepa mai le Matagaluega o Faatoaga ma Faigafaiva i luga o le uafu, e mafai ai ona e alu ma le i'a mata i Ausetalia. E faapena foi Niu Sila, ae leai la se tapulaa, e mafai ona e alu ma le kula. Ia o le mea lea e i ai nei ou te vaai e mafai lava ona alu atu le tagata ma ni ana kula se 2, ae ia i ai lava le pepa lea e avatu i le quarantine. A leai se pepa faapena, ia, e malie e ese le mea e ave i ai lau kula i'a pe a e taunuu atu. Ma le faaaloalo.

FOFOGA FETALAI: Malo faafetai.

Tofa Hon LOPAOO NATANIELU MUA: Ia, ona faauma atu ai matou upu. O lea sa taulilo nei i le vao, a o lea ua faaalia i nuumotu le mulivaito ina ua le oloia faa-maa o tafeaga o le vaitafe pe talipeau popoe foi sota taofi aua le sapiga o le tofa faalele ma le utaga saili a le mamalu o le tatou Maota aua Samoa ma ona tagata nei ma e lua. Ae faauma atu ai le faamatalaga, ia manuia si o matou itumalo, manuia le tatou Matagaluega e le gata i le Matagaluega o Faatoaga ma Faigafaiva faapea foi le Fale Suesue, manuia Ofisa Sili o Pulega o Matagaluega ma Faalapotopotoga a le Malo, e faapea foi le Maota nei. Soifua ma ia manuia.

FOFOGA FETALAI: Malo faafetai. Ia, ua oo mai le faasologa i lau Afioga i le Minisita mo Galuega, Felauaiga ma Atinae Eeseese.

Ou te tapa ma le faaaloalo lau Afioga i le Minisita.

Susuga Hon PAPALIITELE NIKO LEE HANG (Minisita mo Galuega, Felauaiga ma Galuega Eseese): Faafetai atu i lau Afioga i le Fofoga Fetalai mo le avanoa. E fia piama foi lou nei sui usufono i le taulaga siitia e lau Afioga e faafetaia ai lo tatou Tama o i le Lagi ua tatou toe sii faatasi ai Lona viiga e tatau ai, Lona alofa, Lona faamaoni ma Lona agalelei ua mafai ai ona tatou fesilasilafai i lenei taeao i so outou soifua manuia ma so matou ola. Ia viia pea le Atua.

Ou te muai faatalofa atu ma ou faatulou i le pau o le Maota o sasao nei i le afio o lau Afioga i le Fofoga Fetalai, afio lau Afioga i le Palemia faapea lau Afioga i le Sui Palemia ma le paia o Afioga i Minisita o le Kapeneta. Afifio foi Afioga i Minisita Lagolago.

E faatalofa atu foi i lena Itu o le vai i a outou Afioga i Taitaifono ma Sui Taitaifono o Komiti Faa-Palemene, ae a le mamalu o sui usufono uma o le Palemene. Lau Afioga i le Failautusi, Sui Failautusi ma le maave eseese o le Ofisa o le Fono Aoao Faitulafono, afifio Ofisa Sili o Pulega o Matagaluega ma Faalapotopotoga Tumaoti o si o tatou Malo.

Ou te fia faatalofa atu foi ma faatulou atu i le paia o Samoa o lo o faafogafoga tapuai mai, mai ona mauga tetele seia paia ona mauga iti. Ae a le faafogafoga tapuai mai a le aufaigaluega paia a le Atua mai ona fatafaitaulaga e fia o lo o nonomanu mai nuu ma afioaga e fia o Samoa aua so tatou manuia.

Ou te fia faatalofa faapitoa atu foi i si ou itumalo pele, le Nofoa Tu Taulaga i Sasae. Malo le soifua manuia. Lau Afioga i le Fofoga Fetalai, o le a ou toe oo atu i si ou itumalo i se taimi ae le i maea lau folasaga.

O outou paia faale-Ekalesia, paia faale-atunuu paia faale-Malo i ona tulaga faalupeina, o le a nuunuu atu ia faatini o tausala. O paia lava ia i Aiga ma Tama, o Tama ma Aiga, le usoga a Tumua ma Pule, Ituaau ma Alataua, Aiga i le Tai ma le Vaa o Fonoti, tulou, tulou, tulouna lava.

Lau Afioga i le Fofoga Fetalai o le tuualalo ae le o se faatonuga, pe mafai ona taofiofi le faauilavea, o lea ou te vaai atu toe 30 minute lea e totoe ae se i faasaosao atu lau folasaga se i maea ona tali ai lea o faauilavea. Ma le faaaloalo lava, ae pule lava lau Afioga.

Lau Afioga i le Fofoga Fetalai ua ou tulai atu i le ava ma le faaaloalo tele e tali atu ai i mataupu sa laga mai e sui usufono mamalu. Ae pei ona silafia e le mamalu o le Palemene, o le Matagaluega o Galuega, Felauaiga ma Atinae Eseese o lo o faatautaia ma mataitu Tulafono ma faiga faavae o Faalapotopotoga Tumaoti ia a le Malo o lo o i lalo o le vaavaaiga a le Minisita o Galuega. O le Pulega o Felauaiga i le Laueleele (LTA), Pulega o Uafu ma Taulaga (SPA), Pulega o Malae Vaalele (SAA), Kamupani Vaa o Samoa (SSC), Faalapotopotoga o Vaa o Samoa (SSS), Faalapotopotoga o le Malosi Faa-Eletise (EPC), Pulega o le Suavai (SWA), Kamupani o lo o Umia Sea a le Malo (PFL), faatasi ai ma le PUMA.

Lau Afioga i le Fofoga Fetalai, o le tele lava o saunoaga a sui usufono mamalu, sa faapito augafa lava i auala galue, auala i totonu i nuu ma afioaga ma faapatu e faapatupatu ai tatou aualatetele, o moli eletise manaomia, faapea auunaga tau suavai, ia ma taligalu. E faafetai atu foi i sui usufono mamalu sa afea i a latou saunoaga auunaga a le tatou kamupani vaa (SSC), faapea galuega a le tatou Pulega o Malae Vaalele. O nisi o mataupu sa laga mai e sui usufono mamalu ua maea ona ou tali atu i ai e ala i ni faauilavea.

Lau Afioga i le Fofoga Fetalai, ae ou te le i tali atu la i nisi mataupu sa laga mai lauga a sui usufono mamalu, e muamua lava ona fia faamauina le agaga faafetai ma le faamalo i lau Afioga i le Minisita o Tupe, aemaise le susuga i le Ofisa Sili o Pulega ma le aufaigaluega a le Matagaluega o Tupe, mo le tapenaga maeaea o le tatou Tala Faatatau Autu o Tupe Maua ma Tupe Totogi 2020/2021. E fia faamauina foi se faafetai ma le faamalo i Matagaluega ma Faalapotopotoga uma a le Malo sa lagolagosua i le tapenaga.

E fia faamauina foi se faafetai faapitoa i le Afioga i le Taitaifono, Sui Taitaifono ma sui usufono mamalu uma o le Komiti o Tupe a le Palemene mo la outou lipoti aemaise ai o ni tou fautuaga o lo o tuuina mai i ai. Faamalo le galulue, malo tauatai. O le tatalo, ia agalelei pea le Atua nate taitaiina outou i le faatinoina o tiute ma galuega ua valaauina ai e le Atua outou.

Lau Afioga i le Fofoga Fetalai, pei lava ona ou faailoa muamua atu, o le tele lava o mataupu sa lagalaga ai finagalo o sui usufono mamalu, e aofai ai auala galue ma auala i nisi o afioaga e manaomia le faalelei e fia faalelei, moli auala, suavai taumafa, taligalu faapea foi ma patupatu. Na ou faamauina uma talosaga mai sui usufono mamalu pei ona ou folafolaina atu, ma o le a tapena atu i ai pulega eseese ia e aafia pe a pasia le tatou Tala o le Tupe.

Sa talosaga ni sui usufono mamalu mo ni patupatu lea sa ou taua muamua i luga o alatetele i totonu o o latou afioaga, ma tuuina mai ai se fautuaga mo ni over bridges, auala foi nei e kolosi i luga o auala. Mo le silafia e le Maota sa suesueina e le LTA le mataupu leni, o over bridges mo le kolosi lea e i luma o le Development Bank lea foi sa laga mai e le sui usufono mamalu le mataupu lea. O le manatu e lelei ma sefe le tulaga lea mo le puipuiga o le saogalemu, ae peitai sa i ai ni faafitauli, aemaise le tulaga tau tupe sa toe faataatia ai lea tulaga, ona e fai lava si taugata.

Sa fesiligia e se sui usufono mamalu mai Falealili Sisifo ni aoaoga mo Seafarers aua le puipuiga mo saogalemu i luga o vaa aemaise ai vaafagota alia. O le taimi nei mo le silafia e lau Afioga i le sui usufono mamalu, o lo o faia aoaoga mo le aufaifaiva tau saogalemu i totonu o le NUS Maritime School.

O le Afioga i le sui usufono mamalu mo Falealili Sasae sa fesiligia le vaegatupe foi lele o le \$4 miliona lea e i lalo o le CSO programme a le Pulega o le Suavai. Ia mo le silafia foi e le mamalu o le Palemene, a tagai ane i le Tala Faatatau o le Tupe, o la e i ai le \$4 miliona lea o le vaegatupe lea

faaagaaga mo galuega CSO, a o lalo ifo o lo o i ai le isi vaegatupe e \$11.4 miliona, o le tupe la lea e faaagaaga mo capital works, ona e pei sa talosaga mai le sui usufono e faaoga le \$4 miliona lea e faatino ai galuega o mea o paipa foi ia e maua atu ai le suavai i nuu ma afioaga. Ia o se faamalamalama lea leaga o le \$4 miliona e le faaogaina i mea ia o capital works.

O lea la... a matau i luga o le Tala o le Tupe, e \$6 miliona lea sa faaagaaga mo le tausaga lea e faagasolo nei. Tausaga Fou lea ua tuu i ai le \$11 miliona, le fesoasoani lea, ona e le o po se lilo, e silafia uma e le Maota nei e le o toe aumaia le fesoasoani lena e le EU, lea sa masani ona faalagolago i ai le tatou Pulega, mo galuega tetele. Ia o se faapupulaina lea o le mataupu lea, aua a faapea e le faaogaina le fesoasoani lea e auala mai i le CSO, ia e amo uma e le Pulega ia tau ia, ia ma faaopoopo ai le tau o le pili o suavai.

Ae ona ia faamalamalama atili le tulaga lea, o le \$4 miliona lea.... ae ona sa talosaga le Pulega mo se isi \$2 miliona. E i ai galuega ia e tai pei o eletise e faaoga i pamuvai, e alu ai le \$3.2 miliona. O le faamamaina o fanua e i ai totonu le pamuvai ma tanevai, ia e alu ai le \$400,000. O totogiina o fanua ia e faaoga e le Pulega, pe a moomia se pamuvai fou, po o se tanevai, ia e faatupe ai ia fanua o aiga e faaoga e le Pulega.

Ia e i ai la ma isi mea ia sa ave i le talosaga e tai pei o mea ia o fire hydrants, ia ma mea foi ia o auala ia e kolosi pe a tipi se laina mo se talosaga a se aiga e kolosi ai le aualatele, ia o le isi tupe lea e faaagaaga mo ia galuega aua le toe faaleleina o le auala tele. Ia e pei o le tulaga lena mo le silafia e le afioga a le sui usufono mamalu, aemaise foi le mamalu o le Palemene mo le faamatalaina o le tulaga lea.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai...

FOFOGA FETALAI: Se i maea mai le saunoaga a le... se i saunoa pea se i...

Afioga Fuimaono Teo Samuelu Teo: Leaga o lea ua oo tonu lava i le mea lea..

FOFOGA FETALAI: Ia, se i tuu atu le avanoa... o le fesili sa sau a i lau saunoaga?

Afioga Fuimaono Teo Samuelu Teo: Ia e pei o lea e tali mai le Afioga i le Minisita ona o au lea sa laga le \$4 miliona lea o le CSO. O le tatou Community Service Obligation lea.

FOFOGA FETALAI: Ia saunoa le sui usufono.

Afioga Fuimaono Teo Samuelu Teo: Leai o le vaega lea e faasese ai le tele o matou nei, ona o faaupuga i lalo o le Paketi, o lea e tuu sao le \$4 miliona lea i lalo o le CSO. Ae o lea e matau atu i le faamalamalamaga a le Afioga i le Minisita, o le tele o le vaegatupe lea, e toe alu i le totogiina o pamu ia e faaalu ai le vai foi lea.

O lona uiga la, i se matou malamalamaaga, e na ona faaupu o le CSO, ae e le faapea o le tupe atoa lea e alu e fesoasoani ai, i aiga limavaivai e faaoo i ai i latou fale, pe a le gafatia, pe oo ai foi ia le paipa. O le ala lena na ala ai ona fesiligia ae o lea ua aumai le faamalamalamaga, o le bulk o le tupe lea, e \$3.3 e pei o se mea faapena, e alu i le toe totogiina o mea ia.

Faapea lava lou malamalamaaga faapea o le obligation lena a le Matagaluega, e totogi e latou, a o galuega lava lea e fai e aumai ai le vaegatupe lea e aumai lalo o lem CSO, e faapitoa lava, mo le auunaga lautele lea. Ia faaoo le uaea eletise i le aiga la e mamao i uta ia le latou fale e le gafatia, faaoo le suavai. E pei o le ala lena e ala ai ona ou fesili, leaga e le manino, leaga o lea e faapei e foliga mai la, e na ona faaata mai o le vaega lea a le CSO, ae e leai, o la e toe faaoga lava e le Matagaluega e totogi ai pamu ia ma le maintenance o lotoa ia e i ai tatou pamu ma le agaga faaaloalo.

FOFOGA FETALAI: Faafetai, ia tulai mai le Minisita.

Susuga Hon PAPALIITELE NIKO LEE HANG: Lau Afioga i le Fofoga Fetalai, sa ou faapea o malamalama ia le sui usufono mamalu i le faamalamalamaina o lana mataupu, ae peitai ou te le o mautinoa e pei o malamalama moi, ae mo le faapupulaga e pei o le tulaga lea o le CSO, o le tupe lea e le aapea, a faaoga... aua e le aumaia la le tupe lea e fesoasoani ai i totonu e totogi ai pili o le eletise, e le totogi ai ni pamuvai e pei ona e saunoa ai.

O le totogiina o le pili o le eletise o la e faaoga ai ia pamuvai, mo le agai atu e fesoasoani ai e alu atu ai le vai a aiga ma afioaga eseese. Ae o lea e pei e te saunoa mai e tatau ona pay pea e le... e sao o lea e pay lava e le SWA ia mea ia. Ae e leai, e ala la ona talosaga i se tupe, ona e le o lava se tupe i paketi a le SWA. O lea la e maua ai le faamanuiaga lea, ma o lea foi ua faamanuia ai ma tatou, consumers. A leai, e folo e le SWA ia costs nei, ona faaopopo lea o consumers, ia ona maua lea e tatou le mamafa o le mea. Ao lea le faamama avega, lea e faaoga ai la tupe ia, na ua uma ona ou faamatalaina ia le \$11 miliona lea i lalo, le tupe lena e faaagaga mo galuega ia tou te tatalo mai ai.

O galuega la ia fou. O mea foi ia o afioaga ia e le o oo atu ai le suavai taumafa, vaegatupe la nei e faasoia e le Pulega o Suavai, e pei e le o toe maua mai fesoasoani i le EU. Ia, o le tupe la lea o le a faasoasoa leaga e le na o lou itumalo se afioaga o lou itumalo o lea e tatalo mai i le Suavai. O le tele ia o

talosaga ia e taatia i le Ofisa o le Pulega o Suavai. A lea e faasolo atu lava le galuega, ia soo Samoa, i le suavai taumafa, aua le soifua maloloina. Ia o se toe faaopoopo atu lea, i lau toe faafesili mai i le faaaogaina o le CSO.

FOFOGA FETALAI: Malo...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai...

Susuga Hon PAPALIITELE NIKO LEE HANG: Sa fesiligia e le sui usufono mamalu o Faasaleleaga Nu.1. Sisifo, le faaaogaina e nisi o aiga a le toeaina po o le loomatua penisione se i tulou, o latou IDs mo nisi mo femalagaiga i luga o vaa. Sa fesiligia le Kamupani Vaa pe faamaonia lea tuuaiga, ae tali mai latou, o lo o malupuipua lava le faaaogaina e le aumatutua penisione o a latou IDs mo le femalamagaiga i luga o vaa. Ae e le o faatagaina ia le faaaogaina e nisi o aiga o le aupenisione. Ia atonu e faamalulu atu ai i lau Afioga e le sao ia lea tuuaiga.

Afioga Hon Gatoloaifaana Amataga Alesana Gidlow (Faasaleleaga Nu.1 i Sisifo): Lau Afioga i le Fofoga Fetalai...

FOFOGA FETALAI: Tulai mai le sui usufono o Faasaleleaga Nu.1. Sisifo. Tulai mai lau afioga i le sui usufono.

Afioga Hon Gatoloaifaana Amataga Alesana Gidlow: Faafetai mo lou avanoa. Leai o le tulaga lea e le o ni tala na ou faatupuina e i ai foi le mea na maua ai lenei faamatalaga.

E faamalulu ne i ua afaina ai se finagalo o se isi o le afaigaluega, ia ae o le mea foi e avatu e faatupu manatu ai pea. Ia ae faapea o la e malupuipua, ia faafetai i lau Afioga i le Minisita. O le tatalo lava ia ina ia mafai ona toe faataga nai penisiona e faaaoga ia latou cards. Ia e faafetai tele lava.

FOFOGA FETALAI: Ia se i tulai mai le Minisita.

Susuga Hon PAPALIITELE NIKO LEE HANG: E manatu lava, so o se Faalapotopotoga lava e tulai mai ia mea sese ia. O le faaaoga e alo ma fanau ia po o ni aiga o lea aupenisione o latou cards ia e feoi i luga o vaa. Ae o le faaiuga mai o lau saunoaga, o lea sa folafola mai nei i le taeao le isi vaega o le tatou SOE. O lea ua tatala le feoi o tagata matutua, e toe faaaoga a latou cards e feoi fua i luga o tatou vaa. Ia o se faapupulaina ia o lau saunoaga.

Lau Afioga i le Fofoga Fetalai sa fesiligia e nisi o sui usufono le le toe taliaina o le ID o lea la ua ou tali atu ai. Talu mai ia le tatou SOE, sa fautuaina

ai e le Komiti o le NEOC, le taofia o le femalagaiga o tagata matutua, 65 tausaga ma sili atu e vulnerable pe pesia gofie i le Koviti-19. O le upu masani lava a le atunuu, e sili lava le puipuia i lo le tau togafitia.

Ae peitai o le taeao nei ou te fiafia tele e tau atu i le mamalu o le aupenisione, o lea ua toe tatala mai e le Kapeneta le faatagaga, e toe faaaoga ai a outou Ids mo le femalagaiga i luga o vaa, a le tatou Kamupani Vaa SSC.

Sa fesiligia e le sui usufono mamalu mai Faasaleleaga Nu.3. le tatou malaevaalele i Maota ma Asau. Pe aisea ua le toe faaaogaina ai? Pe ua le toe saogalemu mo le femalagaiga a vaalele? Mo le silafia e le sui usufono mamalu faapea foi le paia o le Palemene, o le tatou malae i Maota o lo o tatala pea mo le faaaogaina. Ma e le i mamao atu foi se taimi, sa faatino ai le safety audit a le tatou Aviation Authority. O le leai lava o ni vaalele e feoi i lenei vaitaimi, ae o lo o tatala pea ia le tatou malaevaalele i Maota. Sei vagana ai Asau, e le o saogalemu i le taimi nei.

Sa fesiligia e le sui usufono o Faleata Nu.3. le tulaga o le stimulus package mo se fesoasoani faamama avega a le EPC mo pili o le eletise a hotels. Sa talosagaina e le sui usufono se isi faamama avega faaopoopo atu i luga o fesoasoani ua uma ona pasia e le Kapeneta. Ma ua faailoaina i totonu o le Tala Faatatau Autu o Tupe 2020/2021.

Lau Afioga i le Fofoga Fetalai, e 10 le aofai o hotels ua faamanuiaina mai i le Daily Fix Charge lea sa concern i ai le sui usufono mamalu, lea ua faaitiitia i le 50% mai i le rate masani. Ae e le gata i lea, o lo o aveese foi le 10sene mai isi components o le Tariff e pei o le Dead Charge, ma le Usage Charge.

O hotels ia e 10 ua molimauina e tele le latou faaaogaina o eletise ma e aofia ai le Sheraton Hotel, Sheraton Resort, Taumeasina Resort, Tanoa Tusitala Hotel, Return to Paradise Resort, Coconut Resort, Sinalei Tropical Resort, Saletoga Sand Resort, Jetover Hotel, ma le Tofamamao Project.

Lau Afioga i le Fofoga o le Fono ma le Palemene, e le o maua e isi hotels laiti le faamanuiaga lea o le 50% i luga o le Daily Fix Charge, sei vagana le 10sene lea e faaitiitia ai latou i le Dead Charge ma le Usage Charge. O le talosaga a le sui usufono mamalu ina ia toe iloilo ia le Daily Fix Charge mo hotels ia e agavaa, pe mafai ona 100% ia le reduction ae e le o le tulaga o le 50% ona o le mafatia ua i ai nei ia hotels, talu mai le faamai o le Koviti-19.

E manatu le Pulega lau Afioga i le Fofoga Fetalai, o le EPC ua tele lea fesoasoani i hotels, aemaise ai foi ua matauina ia le faaitiitia o le faaaogaina o eletise i hotels i lenei vaitaimi, ona o le aafiaga i le leai o ni turisi ona o le Koviti-19.

Lau Afioga i le Fofoga o le Fono faapea le mamalu o le Palemene, e \$1.5 miliona le deficit, le tupe pau a le EPC i le masina muamua o Aperila, talu ona faamamalu le tau pau fou lea o le eletise mo le stimulus package. O lea foi ua toe extend e le Malo ia le stimulus package ia Tesema i le tausaga nei.

O lo o silasila nei la le Pulega ma le Komiti Faatonu pe faapefea ona survive le EPC i lenei vaitaimi umi.

Lau Afioga i le Fofoga Fetalai o le upu moni, ua tele ma ogaoga le aafiaga o le tatou tamaoaiga ona o le Koviti-19. Ma ua aafia uma ai ia auaunaga a tatou Matagaluega ma Faalapotopotoga a le Malo, e tai pei o le EPC. O ooooga tuga pe a faaaauau pea le aafiaga o le tatou tamaoaiga i le faamai, o le a silasila loa i nisi Faalapotopotoga Tumaoti ua tele le aafiaga o latou tupe maua, e faamalolo le tumau ai nisi o latou tagata faigaluega. E le o le mea lea e lagolagoina e le Malo, ae o le tulaga lea e tatou te oo i ai pe alu pea ia le tulaga o le aafiaga o le tatou tamaoaiga.

E le o po foi malae i le aafiaga tuga o aafia ai ia o tatou faletalimalo, aemaise foi isi pisinisi eseese uma e aofia i le Private Sector i lenei vaitau. Lau Afioga i le sui usufono mamalu i Faleata Nu.3. o lau uso lava oe ia Keriso. Taatia maia lau talosaga faigata, se i toe silasila i ai le EPC, ma le Komiti Faatonu. Sa fesiligia foi e le sui usufono ia le tulaga o water hydrants i Mulinuu nei. E 2 ni fire hydrants ua faailoa mai e le Pulega o le Suavai o lo o i Mulinuu nei. E tasi o lo o latalata ane i le Vaai Tau, ma le tasi o lo o faafesagai ma le 2AP tuai.

Sa fesiligia foi e le sui usufono mamalu ia kamupani vilimaa po o Quarries o lo o i totonu o Vaitele. Ou te iloa o fanua ia i Vaitele lau Afioga i le Fofoga Fetalai, ua faatulaga ai kamupani vilimaa ia. Sa pasia lava ma faatagaina e le Malo i lena vaitaimi ona o eleele ia o lo o i totonu o le Industrial Zone. Sa matou asiasia ma le PUMA ia Quarries ia i Vaitele, ma faamaonia ai e 4 ia Quarries ia i Vaitele ma faamautu i le Industrial Zone i Vaitele. Ua i ai nei la ni faasea mai le mamalu o le atunuu, ua aafia latou mai nei ituaiga pisinisi. Ma o lo o fai ai nei suesuega a le PUMA, mo se fofo talafeagai mo lenei faafitauli.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai...

FOFOGA FETALAI: Ia malie se i tulai mai le sui usufono o Faleata.

Tofa Lealailepule Rimoni Aiafi: Faafetai lava, faafetai tele i le Afioga Minisita, ne i te i foi ua vavevave lana tali o le a tatou manava tapena lelei mo lea vaiaso. Ae taua tele le vaega lea ua oo i ai.

Faafetai o lea ua tali mai e taatia atu. Lau Afioga, ia, ma savalivali atu lava, e toatele matou na matou savalivali atu i lau Afioga. Faafetai foi i le tali mai. A o lena ua avatu uma ia te oe mafuaaga talafeagai, e totogi pili consumptions, mea e faaoga, a o le tau lea faaopoopo, ia e alofa ane. E pei lava ona ou talanoa atu, o le isi kamupani lea, e \$20,000 lana pili foi lea faaoga masani i le masina, ae \$23,000 le tau faaopoopo lea. Ua tele atu le tau faaopoopo i le tau o le faaoga, a o lea faafetai o lea ua e tali manino, e

pei ona ou talanoa atu, aua o le mea e fuafua foi i nai tagata faigaluega ia taofiofi nai tagata faigaluega i lenei vaitaimi ona e le faigofie. A o lena foi mea o le polofiti, manatua foi o le EPC o le EPC uma a tatou. Ioe, aua tatou te naunau tele i le polofiti i lenei taimi, ae tatou vaavaai i le lautele i le agai i luma.

Ae faafetai lava o lea ua taatia mai i lau Afioga le mea lea o le vilimaa ona e taua tele, ae lelei foi pe se i oo i le Afioga i le Minisita mo le Siosiomaga ona toe tatalo lea i ai, ae o le a talitali atu pea lou finagalo alofa leaga o lea na tatou fonu i le aso lea, ae tutu atu lau fanau e tipi moli o nai tagata ae faafetai tele lava i lou agaga. E pei ona e talanoa mai, o aso nei, o le aso o le alofa, o aso tatou te faaoga ai le fuafuaga tatau. Faafetai lava.

FOFOGA FETALAI: Ia, tulai mai le Minisita mo Galuega.

Susuga Hon PAPALIITELE NIKO LEE HANG: Lau Afioga i le Fofoga Fetalai, e tatalo atu i le Afioga i le Ofisa Sili o le EPC se i faamau ifo lava le... leaga sa ou vaai i le lipoti lea mai le hotel. E sao e maua lea le fix charge i lo le consumption. Se i silasila ane i le tulaga lea pe sao ae fai se fuafuaga pe a faapea ua tele lena fix charge ae o la e laitiiti le faaogaina o le eletise.

Ma le isi mea lau Afioga i le sui usufono mamalu, se i fai ma totogi tou arrears la e i ai, o le mea lena ua tatipi ai tou pili, o le le totogiina o tou arrears. A ua uma foi ona tatalo i le Pulega se i toe alolofa atu e toe faaola tou moli, ae se i fai se fuafuaga i tou arrears faamolemole.

Tofa Lealailepule Rimoni Aiafi: Se faamolemole lava lau Afioga, malie lava lou finagalo, o Lealailepule e leai sana arrear faamolemole lau Afioga. Ua faamalamalama foi e le Afioga i le Minisita, o le auala o lou oo atu, o le fesoasoani foi i nai tagata ia i le maua va feagai ai. Ae o arrears pei ona saunoa le Afioga, faatoa amata nei ina ua sau le Koviti. Ae faamalamalama lau Afioga i le Minisita, e leai ma se arrear talu mai le amataga, faatoa arrear nei lava ina ua i ai le Koviti lea. O le ala lea o le tatalo atu i lau Afioga, e le o se arrear a au po o se arrear a nai kamupani ia, o le arrear a le Koviti-19. Faafetai lava.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, faafetai lava i le saunoaga a le sui usufono lea faatoa faamaui atu lona tootoo e faafetai mai ai i le faaoga o le faautautaga tatau. O le mea lea o le faautautaga tatau, o le pelu e taua maai itu. Ina ne i te i ua mao lou faaoga o le upu faautautaga tatau, ae liliu atu le EPC toe tuu agai i luga ona

e i ai foi faaletonu. E pei o le mea lena ua ou toe tulai atu ai, i te i foi ua tatou toe pisa ai i lea vaiaso i le faaaoga o le faautaga tataua ae tuu atu ua toe faaopoopo i luga le pili ona e i ai foi nisi agasala veniale tatou te le o iloa.

Afioga Tafua Maluelue Tafua: Lau Afioga i le Fofoga Fetalai...

FOFOGA FETALAI: Malo faafetai. Masalo se i... Leaga o lea ua tatou oo i le taimi manava, ae pe...

Afioga Tafua Maluelue Tafua: O le mea lena sa ou tulai atu ai e faamanatu atu le taimi. Ae a faapea e i ai sina ou avanoa, ou te talia ma le fiafia.

FOFOGA FETALAI: Ae a pe a fai ifo i fafo lau faauilavea? Lau Afioga i le Minisita se i... toe lava o nai minute ia e lua...

Susuga Hon PAPALIITELE NIKO LEE HANG: Lau Afioga i le Fofoga Fetalai, ua matauina ua uma le taimi ae se i ou tali atu pea i lou uso ia Keriso. O le tulaga lea e saunoa mai ai, e sao e le o se arrears a Lealailepule, o le arrears a le Sheraton. Ou te le o malamalama la pe i ai se share a le tamaloa i le Sheraton, ua finau mai lava i le Sheraton ae le finau mai i isi hotel. Ma lou faaaloalo lava, leaga ua maea le taimi.

FOFOGA FETALAI: Malo. E i ai le upu foi lea e i ai lava le taimi e maua ai. Ia, ona o lea ua tatou... Malie ia Lealailepule o lea ua tatou taunuu i taimi manava.

Tofa Lealailepule Rimoni Aiafi: Faamolemole lau Afioga. Ioe lau Afioga, na ona faamalamalama, e leai e le o au o se shareholder, o au o le owner. Ma le faaaloalo lava.

FOFOGA FETALAI: Malo. E ese le fia maumea o lea mea mativa. Ia, ona o lea ua tatou taunuu i le taimi e manava ai le tatou Galuega, o le aso Faraile, o lona taimi manava o le 12:00. Ae tatou te le i tolopo ou te tapa le sui usufono mo le Nu'u Tu Taulaga i Sisifo le Afioga ia Faumui e te tulai mai e faaiu le tatou Fonotaga i se tatalo.

Na tolopo Galuega a le Fono Aoa'o Faitulafono i le itula e 12:01 i le aoauli seia aulia le itula e 9:00 i le taeao o le aso Gafua, 29 o Iuni 2020.